



SRCE ZA DJECU

**BILTEN**  
**2019**

BROJ 8 · 15.02.2019.

# BILTEN 2019

## Sadržaj

Moja kosa tvoja kosa	5
Rehabilitacija	20
Roditeljska kuća	24
Srce za djecu Tuzla	50
MladiCe	54



## SRCE ZA DJECU

### SRCE ZA DJECU OBOLJELU OD RAKA / THE HEART FOR KIDS WITH CANCER

Betanija bb, 71000 Sarajevo,  
Bosna i Hercegovina

#### Kontakt:

**Tel/fax:** 00 387 33 215 416

**GSM:** 00 387 62 347 395

**E-mail:** info@srcezadjecu.ba

**Web:** www.srcezadjecu.ba

RAIFFEISEN BANK BOSNIA AND HERZEGOVINA

161 00000 388 900 27

IBAN: BA 391610000038890027

S.W.I.F.T.: RZBABA2S

#### IMPRESSUM

##### Bilten Udruženja

##### “Srce za djecu oboljelu od raka”

Izlazi godišnje

**Izdavač:** Udruženje “Srce za djecu oboljelu od raka”

**Za izdavača:** Fikret Kubat, direktor Udruženja

**Urednik:** Atifa Buldić-Bešić

**Pripremili:** Volonteri i saradnici Udruženja

**Lektura:** Dijana Kalinić i Nermina Čuzović

**DTP:** TRIPTIH, Sarajevo

**Štampa:** SAVART M, Sarajevo

**Tiraž:** 2500

ISSN 2303 - 4270



## Dragi naši,

Ovo osmo izdanje Biltena Udruženja Srce za djecu oboljelu od raka predstavlja lepezu projekata koje smo uspjeli pokrenuti i realizovati u 2018. godini.

Na početku se moram zahvaliti svim dobrim ljudima koji su stali uz nas i postali dio vojske ljudi koji nesebično pomažu i stoje, rame uz rame, sa našim hrabrim mališanima i njihovim porodicama.

Donosimo vam mnogo pozitivnih priča o ljudima velikog srca, ali i o hrabrim mališanima koji se zajedno sa svojim porodicama snažno bore protiv najtežih dijagnoza.

Jedan od projekata na koje smo posebno ponosni, a koji smo pokrenuli 2018. godine jeste i projekat Prijatelj Roditeljske kuće. Ovim projektom smo omogućili velikim kompanijama, ali i pojedincima, da pokažu svoju društvenu odgovornost i brigu za najranjivijim segmentima našeg društva. Ponudili smo pokroviteljstvo nad deset apartmana u Roditeljskoj kući na period od jedne do tri godine i, u vrlo kratkom periodu, našli pokrovitelje za svih deset. Ovom projektu pridružili su se neki od najvećih bh. sportista poput Edina Džeke, Miralema Pjanića i Damira Džumhura. Više o ovom projektu potražite na narednim stranicama.

Posebno nas je razveselio projekat Ambasador Udruženja, u okviru kojeg smo dobili prvu ambasadoricu, Amru Silajdžić Džeko. Tokom cijele godine, ona je brinula za našu dječicu, posjećivala ih, nasmijavala i uveseljavala. Pored toga, pomogla je da se glas djece oboljele od raka i njihovih roditelja čuje i izvan granica Bosne i Hercegovine.

Naši dugogodišnji prijatelji iz Vakufske direkcije Islamske zajednice u Bosni i Hercegovini, koji su nebrojeno puta dokazali da se uvijek možemo osloniti na njih, pomogli su nam ostvariti saradnju sa Ambasadorom Kuvajta u Bosni i Hercegovini i kuvajtskom asocijacijom za civilizacijski dijalog Tawasul. Udružili su snage i obezbjedili sredstva za fond za liječenje.

Uspjeli smo realizovati i tri donatorske večeri, zahvaljujući našoj prijateljici Renati Savić i velikim prijateljima iz Lions kluba Centar Sarajevo. Ne propustite ove, nadasve, pozitivne i humane priče u nastavku.

Mnogo smo uradili i u Tuzli. Program psihosocijalne podrške uspješno smo pokrenuli i svakodnevno ga, na radost djece, roditelja i medicinskog osoblja, provodimo na Odjeljenju za hematologiju i onkologiju Klinike za dječije bolesti Univerzitetskog kliničkog centra Tuzla, te u Roditeljskom stanu koji smo obezbijedili za našu dječicu i njihove roditelje. Izuzetno smo ponosni i na potpunu obnovu i uređenje Ambulante za hematologiju i onkologiju uz podršku Medical Park grupacije čime smo, našim mališanima, obezbijedili i poklonili čaroban prostor za kontrolne preglede i dnevne terapije. Mjesto gdje će zaboraviti da se nalaze u bolnici.

Zaista je mnogo aktivnosti realizovano u godini iza nas. Radili smo naporno i neumorno, a sve sa ciljem da olakšamo i pomognemo najhrabrijoj od sve djece. Izuzetno smo sretni što ni nagrade za naš trud i rad nisu izostale. Čak dvije su došle koncem prošle godine: Roditeljska kuća okitila se međunarodnom Graditeljskom nagradom CEMEX, koja je i ove godine dodijeljena u Meksico City-ju, a nagradu za Humanistu godine 2018. SNL Magazina, imao sam čast lično prihvatiti.

Mnogo je toga što bismo željeli podijeliti s Vama, pa se unaprijed zahvaljujemo na minutama koje ćete izdvojiti listajući i čitajući naš Bilten. Ovo je, također, jedna od prilika da Vam se zahvalimo što ste dio ove priče o hrabrosti, snazi, ustrajnosti i borbi.



Srdačno Vaš,

Fikret Kubat



*... podržavajući borbu  
za život jednog djeteta,  
podržavate potencijal  
da to dijete odraste...*

# UDRUŽENJE U PROTEKLOJ GODINI



## Amra je ponosna!



Još jedan veoma važan i značajan projekat, "Ambasador udruženja Srce za djecu oboljelu od raka", predstavili smo u 2018. godini. Ovaj projekat bi trebao okupiti važne i upečatljive ličnosti iz javnog života, koje će se zalagati za dobrobit i bolji položaj djece oboljele od raka i njihovih najbližih u društvenoj zajednici, u skladu sa misijom i vizijom Udruženja.

Svojim utjecajem će širiti svijest o dječjem raku kao oboljenju te promicati i zagovarati činjenicu da je rak kod djece izlječiv. Također, njihov glas bi trebao preći granice Bosne i Hercegovine i postati glas naše djece u Evropi i šire.

Ime prvog ambasadora čuvali smo kao iznenađenje do samog dana predstavljanja. Za prvu Ambasadoricu Udruženja izabrali smo Amru Silajdžić Džeko, koja je i ranije podržavala rad Udruženja.

Amra je, prije svega, majka troje djece koja suosjeća i cijeni vrijednosti roditeljstva, ljubavi, zajedništva i podrške i odlično se uklapa u ulogu Ambasadora, jer može istinski prenijeti sve ono što roditelji i djeca oboljela od raka osjećaju i trebaju.

Kao prva ambasadorica Srca za djecu, Amra Silajdžić Džeko širila je vrijednosti projekata "Roditeljska kuća" i "Moja kosa tvoja kosa" u bosanskohercegovačkoj i međunarodnoj javnosti te je inspirisala ljude širom BiH i svijeta da promovišu i doprinesu misiji i viziji Udruženja.

Tokom predstavljanja Ambasadora, Amra je bila vidno emocionalno potresena i sa suzama u očima rekla je da je ponosna i da joj je čast što su je "roditelji heroja izabrali da bude njihov glas koji će raditi za dobrobit ove djece, glas koji će se čuti što dalje i što duže".

"Roditeljska kuća ima nekoliko projekata, jedan od njih je 'Moja kosa, tvoja kosa', veliki broj ljudi se odazvao. Puno se priča o negativnim stvarima, politici, a malo o tome da ima veliki broj ljudi koji hoće da pomognu. Sigurna sam da ćemo zajedno ostvariti velike stvari", rekla je Amra.



# Moja kosa tvoja kosa

2018. godina iznjedrila je jedan od najljepših i najhumanijih projekata u cijelom regionu. Uz podršku Vlade Švicarske i nemjerljiv doprinos bosanskohercegovačke javnosti, građana i građanki svih generacija, uspjeli smo dotaći zvijezde sa još jednim zaštitnim znakom Udruženja – projektom „Moja kosa tvoja kosa“.

Projekt „Moja kosa tvoja kosa“ omogućio je djeci sa privremenim ili trajnim gubitkom kose da visoko podignu glavu i hrabro koračaju u susret budućnosti.

Gubitak kose i dalje predstavlja svojevrsni kulturološki tabu u Bosni i Hercegovini i regionu. Uticaj gubitka kose na djecu koja se liječe, bilo zbog raka ili nekog autoimunog poremećaja, i njihove roditelje i bliske srodnike, prvenstveno su istraživali zdravstveni radnici koji se fokusiraju

na medicinske uzroke i posljedice gubitka kose. Naše Udruženje istražilo je problem sa psihološkog stajališta i ponudilo rješenje kroz društveno-angažovani projekt „Moja kosa tvoja kosa“ i otvaranjem radionice za izradu perika. Budući da djeca sa trajnim ili privremenim gubitkom kose nemaju pravo na ovakav vid ortopedskog pamagala kroz redovnu zdravstvenu zaštitu, Udruženje se svim srcem angažovalo da ovoj djeci obezbijedi, potpuno besplatno, prirodne perike od ljudske kose, jer su najpribližnije izgledu prije gubitka kose.

U 2018. godini uručili smo 25 perika našim pedijatrijskim pacijentima i mališanima oboljelima od alopecije, što je značajno doprinijelo njihovom boljem fizičkom, psihološkom i socijalnom zdravlju. Roditelji mlade djece navode bolje ishode liječenja i ogromno psihičko i finansijsko

rasterećenje, dok tinejdžeri i mladi navode bolje rezultate u školskim i vannastavnim aktivnostima, manje sažaljenja i maltretiranja od vršnjaka i više samopouzdanja u javnosti. Gubitak kose je prvi vidljivi znak bolesti i trenutak kada se roditelji suočavaju sa mogućim nepovoljnim posljedicama i ishodima. To je veoma bolno i traumatično iskustvo, kako za djecu tako i za njihove roditelje, a dostupnost prirodnih perika pomaže ublažiti utjecaj takve traume.



## Ukoliko ste se odlučili donirati kosu:

Za izradu perika za naše najhrabrije borce kosa treba da je čista, suha i umotana u papirni kuhinjski ubrus te zapakovana u ziplock kesicu na kojoj će stajati ime i kontakt donatora. Kosa mora biti nefarbana, hemijski netretirana i minimalno 30 cm dužine. Tako upakovanu kosu možete poslati ili donijeti na adresu Udruženja: Betanija bb, 71000 Sarajevo.

Hvala vam na humanoj inicijativi i želji da pomognete djeci koja su pretrpjela gubitak kose.

**ZENICA** 25.08.



**80**

DONATORA

**BANJA LUKA** 15.09.



**143**

DONATORA

**MOSTAR & KONJIC** 29.09.



**77&15**

DONATORA

**109**

DONATORA



**TUZLA** 17.03.

**SARAJEVO** 11.11.



**320**

DONATORA

**BIHAĆ** 15.04.



**120**

DONATORA

**VITEZ** 13.05.



**105**


DONATORA

**TEŠANJ** 28.07.



**45**

DONATORA

 Schweizerische Eidgenossenschaft  
Confédération suisse  
Confederazione Svizzera  
Confederaziun svizra

Švicarska agencija za razvoj i saradnju SDC

**PODRŠKU PROJEKTU PRUŽILI SU:** VLADA ŠVICARSKE, OBRtničKA KOMORA KANTONA SARAJEVO, FRIZERSKI SALONI EN STUDIO, FASHION, LA FEMME, HAIR WITH CHARACTER, DŽAN, STUDIO M EXCLUSIVE, MADemoISELLE, OGLEDALCE (SARAJEVO), ELITE, NISA, DENI, ENERGY, EMY (BIHAĆ), ARENA I ENES (TUZLA), CUT (BANJA LUKA) I IN (VITEZ), MJEŠOVITA SREDNJA EKONOMSKO-UGOSTITELJSKA ŠKOLA TRAVNIK, OSNOVNA ŠKOLA „SVETI SAVA“ FOČA, OSNOVNA ŠKOLA „6. MART“ HADŽIĆI, SREDNJA ŠKOLA POLJOPRIVREDE, PREHRANE, VETERINE I USLUŽNIH DJELATNOSTI, SARAJEVO I UDRUŽENJE POSLODAVACA ZENICA - SEKCIJA FRIZERA.

**PRIJATELJI PROJEKTA:** BINGO D.O.O, BINGO CITY CENTAR TUZLA, FIS VITEZ, FRIZERLAND, OVNAK VITEZ, MEPROMEX TEŠANJ, TC DŽANANOVIĆ ZENICA, MEPAS MALL MOSTAR, SARAJEVO CITY CENTAR I UDRUŽENJE RODITELJA DJECE OBOLJELE OD MALIGNIH BOLESTI "ISKRA" BANJA LUKA I LEJLA KUSTURICA.

**Bosanskohercegovački gradovi dočekali nas otvorenog srca i raširenih ruku**

U 2018. godini, sa kampanjom šišanja i doniranja kose, obišli smo skoro čitavu Bosnu i Hercegovinu. Nevjerovatno gostoprimstvo i podršku pružili su nam Tuzla, Bihać, Vitez, Tešanj, Zenica, Banja Luka, Mostar i Sarajevo.



### Obuka za vlasuljare

Sa posljednjim radnim danom mjeseca septembra, mjeseca podizanja svijesti o dječijem raku, zvanično smo završili i obuku za vlasuljare u trajanju od 10 mjeseci, u sklopu projekta Moja kosa tvoja kosa. Tom prilikom smo dodijelili certifikate našim vrijednim, i vidno uzbuđenim, kandidatima koji su sada spremni samostalno izraditi periku.

Čestitamo im svima, od srca, na uspješno završenoj obuci i ovom velikom postignuću. Sama obuka je bila vremenski dugotrajna, teška i izazovna za svakog kandidata što čini ovaj zajednički uspjeh još većim.

Ovi mladi ljudi su veliki društveni kapital i kroz svoj doprinos projektu i vlastitom obrazovanju, dali su i veliki doprinos Udruženju, a i široj zajednici u Bosni i Hercegovini.

Desetomjesečnu obuku za vlasuljare uspješno se završili:

Selma Matoruga, Selma Hadžić, Šejla Hodžić, Fuad Halilović, Amina Zimić, Marina Rubić, Mirela Zrnić, Ela Plevljaković, Medisa Milić, Maja Talović i Nasiha Gušo.

Voditelj obuke: Jasmina Hadžić-Ajanović.




*Pored usvojenog znanja, projekat je za mene bio od velikog značaja, jer mi je omogućio da spoznam da se na različite načine može djelovati da bi se pomoglo ugroženim kategorijama društva. Na djecu sam posebno osjetljiva.*

Maja Talović

### Usavršavanje znanja

Nakon završene osnovne obuke za vlasuljara i postavljanja temelja za ovaj plemeniti zanat, naš Fuad Halilović je usavršavanje nastavio u Beogradu na Wig Hair Master Akademiji koju uspješno vodi i realizuje Marko Majstorović, najpoznatiji srbijanski vlasuljar. Marko nije štedio svoje znanje i skoro dvodecenijsko iskustvo, a Fuad je pokazao želju, volju i nevjerovatan talent. Na mladima svijet ostaje, a mi smo ponosni što vlasuljarski zanat, podmlađen i regionalno umrežen, ostavljamo u dobrim rukama.



### Global Giving

Online kampanja #MojaKosaTvojaKosa (Wigs for a smile) na platformi GlobalGiving.org bila je jedan od načina da se prikupe sredstva za nastavak projekta i osigura partnersko mjesto na platformi. Od 27.11. do 31.12.2018 prikupili smo ukupno 2111 \$ od 49 različitih donatora iz cijelog svijeta, a sa 01.02.2019. smo i službeno postali partnerska organizacija na platformi Global Giving.



# Povratak u život nije jednostavan



MR. MED. SC. DR. LEJLA DOSTOVIĆ HAMIDOVIĆ, KLINIKA ZA DJEČIJE BOLESTI UKC TUZLA, ODJELJENJE HEMATOLOGIJE I ONKOLOGIJE

Maligne bolesti dječije dobi, sa incidencom koja iznosi oko 140 na milion djece godišnje, čine približno jedan posto svih novodijagnosticiranih maligniteta. Pedijatrijske neoplazme bitno se razlikuju od neoplazmi odraslih po prognozi, histološkom tipu i lokalizaciji. Drugi su, po učestalosti, uzrok smrtnosti djece u svijetu odmah iza saobraćajnih nesreća, a zabilježena incidenca ima tendencu povećanja s vremenom.

Prema podacima međunarodne klasifikacije malignoma leukemije čine 34%, tumori mozga 23% i limfomi 12% neoplazmi kod djece mlađe od 15 godina. Najčešće pojedinačne dijagnoze su akutna limfoblastna leukemija, astrocitomi, neuroblastomi, non-Hodgkin limfomi i nefroblastomi.

Liječenje djece sa zloćudnim bolestima je vrlo kompleksno i potrebno ga je povoditi u specijaliziranim pedijatrijskim onkološkim odjeljenjima, gdje radi posebno obrazovano medicinsko osoblje.

Moderno, multimodalno liječenje koje se sastoji od hirurškog zahvata, zračenja i hemoterapije omogućilo je petogodišnje preživljenje, neovisno o tipu tumora, od prosječno 70% do 75%. Prema tim procjenama, jedno od 1.000 (0,1%) mladih odraslih u dobi do 20 godina bit će oni koji su preživjeli liječenje malignoma u djetinjstvu, s tendencijom povećanja tog broja u budućnosti.

## Kombincija lijekova

Citotoksični efekt na tkiva u sazrijevanju postaje vidljiv rastom i razvojem godinama nakon završetka terapije. Ozljede organa različite su u pojedinim bolesnika, a rizik pojavljivanja ovisi o tipu tumora, dobi djeteta pri dijagnozi i nekim genetskim predispozicijama.

Komplikacije liječenja maligne bolesti možemo podijeliti na rane i kasne.

Rane komplikacije se javljaju tokom i neposredno nakon provođenja terapije, s njima se suočava pedijatar onkolog i zbrinjavaju se po definisanim protokolima. Svi organski sistemi mogu biti pogođeni toksičnim efektima terapije. Rane komplikacije liječenja malignih tumora danas se uspješno prevladavaju primjenom kombinacija antimikrobnih lijekova, transfuzijskom potporom, faktorima poticanja granulocitopenije, korekcijom metaboličkih parametara, te primjenom organoprotektivnih lijekova. Pri tome, kod 70% do 75% bolesnika nestaju maligne stanice i organizam se oporavlja, međutim sazrijevanjem i starenjem gubi kompenzatorne mehanizme i toksična djelovanja dolaze do izražaja. Po definiciji, ako se jave pet godina nakon terapije, definiramo ih kao kasne posljedice liječenja malignog tumora, a odnose se na rast i razvoj, na oštećenja pojedinih organa i na javljanje sekundarnih tumora.

Tabela 1. Rane komplikacije u liječenju malignih tumora dječije dobi

hematološke komplikacije	anemija, trombocitopenija, leukopenija, krvarenja, tromboembolije
gastrointestinalne komplikacije	mučnina, povraćanje, kolitis, konstipacija, poremećaj funkcije jetre, pankreatitis
bubrežne komplikacije	bubrežno zatajenje, proteinurija, hematurija
plućne komplikacije	insuficijencija, respiratorni distres sindrom, pleuralni izljev
srčane komplikacije	poremećaj ritma, smanjena funkcija miokarda, perikarditis, hipertenzija, hipotenzija
alergije	preosjetljivost na lijekove, krvne derivate
infektivne	vrućica izazvana bakterijama, virusima, gljivicama ili nepoznatim agensom
neurološke komplikacije	stanje svijesti, edem mozga, konvulzije, ataksija, CVI, encefalopatija,
endokrinološke komplikacije	ekstrapiramidalni poremećaji, kognitivni poremećaji psihoza, periferne neuropatije
kožne promjene	hiperglikemija, SIADH
bol	

Što je viši stadijum/grupa rizika, to je veći broj primjenjenih lijekova i njihova kumulativna doza. Takođe, uznapredovala bolest utječe na broj operacija i stepen njihove mutilantnosti. Sa odmaklim stadijumom/grupom rizika, raste i potreba za radioterapijom i transplantacijom matičnih ćelija, koje su povezane sa dodatnim sekvrelama. Raširenost bolesti značajno smanjuje procenat preživljavanja. Najnoviji podaci velikih internacionalnih studija ukazuju da čak oko 60% odraslih ima makar jedan hroničan problem kao posljedicu liječenja maligniteta u pedijatrijskom uzrastu, a 30% dugotrajne sekvele.

## Zadaća onkologa

Kasne komplikacije takođe zahvataju brojne organe i sisteme, na prvom

mjestu bubrege, jetru, štitnu žlijezdu, utiču na neurološki, hormonski i kognitivni status.

Potreba da se djeca, koja se izliječe od raka, prate kroz dugi vremenski period odavno je prepoznata od strane visoko specijalizovanih ljekara. Bolesnike treba usmjeriti prema zdravim životnim navikama (apstinenciji od alkohola, nepušenju, oprezu pri izlaganju suncu, zdravoj prehrani, itd.), educirati ih o važnosti periodičkih pregleda, tehnikama samopregleda, uključiti ih u programe za rano otkrivanje raka (UZV dojki, mamografija, pregled testisa, kože, stolice na okultno krvarenje, itd.).

Zadaća onkologa je da osmisle vodiče za evaluaciju i praćenje asimptomatskih bolesnika u određenim vremenskim intervalima (jedne do tri godine),

kako bi se uz preglede i laboratorijsku dijagnostiku pravovremeno otkrio zdravstveni problem, započelo liječenje i na taj način poboljšala kvaliteta života pacijenata s hronično oštećenim organima i rano otkrili sekundari tumori.

Kako je liječenje, a potom i praćenje djece oboljele od maligne bolesti dugotrajno, ulažu se veliki naponi da se djeci i roditeljima olakša taj period. Povratak u život kakav je bio prije bolesti djeteta nije jednostavan. Uspješna reintegracija se odnosi, kako na samo bolesno dijete, tako i na roditelje i drugu djecu u porodici (braća i sestre), u čemu učestvuju multidisciplinarni timovi zdravstvenih radnika, socijalni radnici, psiholozi i pedagozi, te udruženja djece oboljele i liječene od raka.



PRIM. PROF. DR MELIHA SAKIĆ, ŠEFICA HEMATOONKOLOŠKOG ODJELA NA PEDIJATRIJSKOJ KLINICI KCUS-A

# Timski rad je ključ uspjeha



**UDRUŽENJE:** Cijeli svoj radni vijek radite kao hematoonkolog i liječite djecu oboljelu od malignih oboljenja. Na funkciji ste šefice Hematoonkološkog odjela na Pedijatrijskoj klinici Jezero. Koliko je težak ovaj zadatak bio za Vas i osoblje i kako je, po Vašoj procjeni, do sada teklo liječenje na odjeljenju?

**DR SAKIĆ:** Posao hematoonkologa, ljekara i osoblja koji učestvuju u liječenju djece oboljele od malignih oboljenja je pretežak i prezahtijevan. Ali, govorim sad u svoje ime, ja ga volim. Ja volim svu djecu, tako da mi to olakšava rad na odjeljenju. Prije Hematoonkološkog odjeljenja, radila sam na Dječijoj hirurģiji kao pedijatar sedam godina, tamo sam i stekla i naučila manuelne vještine koje su, između ostalog, veoma važne za naše male pacijente. Prije rata, djeca liječena na ovom Odjelju oboljevala su uglavnom od leukemija, ali je i mnogo više djece umiralo. Posle rata, ova naša ekipa koja je preuzela kormilo u liječenju djece, prof. dr. Edo Hasanbegović, mr. sci. dr. Adela Tunić, mr. sci. dr. Senada Mehadžić i ja, napravila je divnu saradnju i komunikaciju sa kolegama u zemljama iz okruženja, sa ljekarima iz Turske, Italije i Austrije, te samim tim uradila veliki iskorak u liječenju ovih mališana. Donijeli smo nove protokole i započeli sa liječenjem po njima. Naravno, ni uspjeh u liječenju nije izostao.

## Brojke i život

Zvanični dokument o uspjehu našeg liječenja je moja doktorska disertacija o temi "Leukemije kod djece u FBiH 1997. - 2004." koja je i pokazala da smo uspjeli u našoj namjeri. Sav ovaj uspjeh u liječenju ne bi bio takav da nema naših divnih sestara-tehničara. Mi na Odjelu radimo i živimo kao jedna porodica. Sestre sprovode u djela ono što ljekari stave na temperaturne liste i još mnogo toga. Timski rad je kruna našeg uspjeha. Ja sam šef Odjela za hematoonkologiju u posljednje dvije godine.

**Saopštiti dijagnozu roditeljima je zaista najteži i najgori trenutak. Za tako nešto se ne spremam, znam samo da moram ostati smirena i roditeljima uliti povjerenje**

**UDRUŽENJE: Koliko se djece trenutno liječi na Vašem odjeljenju? Po Vašem iskustvu, da li se broj djece oboljele od raka povećava ili smanjuje?**

**DR SAKIĆ:** Na našem Odjelu su se liječila sva djeca iz cijele Federacije BiH, ali su od prošle godine ljekari iz Tuzle preuzeli jedan dio djece koji gravitiraju Kantonu Tuzla. Broj djece koji oboljeva iz godine u godinu je otprilike isti, oko 50 na teritoriji FBiH. Na našem Odjelu je prošle godine liječeno oko 40 djece od malignih oboljenja i još više djece sa hematološkim problemima. Broj djece oboljele od malignih oboljenja nije tako velik, ali obzirom na to da na Odjelu sada radimo samo nas dvije, dr. Mehadžić i ja, to je strašno veliki broj. Strašno je jer mi ne liječimo samo djecu oboljelu od leukemije, već i od svih drugih vrsta tumora koji se javljaju kod djece, a koji nisu liječeni ni prije rata.

Prema mojoj zvaničnoj doktorskoj studiji, u FBiH broj oboljele djece od leukemije je oko 3,3 na 100.000 djece uzrasta od 0-15 godina. Slijedi rad objavljen na Kongresu pedijataru u Tuzli 2018. "Incidencija djece oboljele od akutne leukemije u FBiH u periodu od 2010. do 2016. godine". Po rezultatima ove studije, uočen je blagi porast oboljelih od leukemija, 4,1 na 100.000 djece.

Prema rezultatima Svjetske zdravstvene organizacije iz 2009., procenat oboljelih od 50 do 60 djece na milion djece zabilježen je u Hrvatskoj, na Kipru, u Finskoj, Njemačkoj, Bugarskoj, na Malti, u Italiji, Češkoj, a ostale zemlje imaju incidencu oko 40 i manju od 40 na milion djece. Naše studije ukazuju da je broj oboljelih od leukemije u našoj zemlji još uvijek manji od broja oboljelih u zemljama u okruženju, što potvrđuju i zvanični podaci Svjetske zdravstvene organizacije. Dakle, sa ponosom mogu reći da liječimo svu djecu i imamo dobre rezultate kao i druge, razvijenije zemlje od naše.

**UDRUŽENJE: Vi saopštavate dijagnozu roditeljima. Koliki je to izazov i kako se pripremate za taj zadatak?**

**DR SAKIĆ:** U ovom poslu, meni je najteže saopštiti dijagnozu roditeljima. To je zaista najteži i najgori trenutak. Za tako nešto se ne spremam. Znam samo da moram ostati smirena i ne pokazivati sažaljenje. Svojim stavom i načinom saopštavanja dijagnoze bolesti roditeljima ulijem povjerenje u moj rad. Nisu svi roditelji istog obrazovnog profila pa se ja pokušavam spustiti na nivo tih roditelja i objasniti im o čemu se radi. Razgovor obično počinjem sa pozitivnim stvarima u toku liječenja bolesti pa ih polako uvodim u srž problema liječenja, što ponekad traje i danima.

**Svima je interes zdravo dijete**

Mi na Odjelu, i sestre i ljekari, moramo biti i dobri psiholozi i dobri u svom poslu. Mislim da sam do sada uspjela da to postignem. Bude tu i suza i žalovanja za nekom djecom, ali i to je ljudski.

**UDRUŽENJE: Već dugi niz godina Odjeljenje uspješno saraduje sa udruženjem "Srce za djecu oboljelu od raka", mnogo je zajedničkih realizovanih projekata. Koliko je, po Vašem mišljenju, bitna ta saradnja i šta ona znači Hematoonkološkom odjeljenju, Vašem osoblju, pacijentima i njihovim roditeljima?**

**DR SAKIĆ:** U ovom našem radu nam zaista mnogo pomaže Udruženje. S ponosom mogu reći da sam, sa Sabahudinom Hadžialićem, jedan od prvih osnivača Udruženja. Tadašnji menadžmet Pedijatrije nije vjerovao u opstanak Udruženja. Nakon nekih problema o kojima ne bih htjela niti da govorim, a niti da ih se sjećam, Udruženje je zahvaljujući sadašnjoj postavi izraslo u jedno od najboljih. Zato ja uvijek i kažem da smo zajedno jači. Saradujemo u mnogim projektima koje Udruženje osmisli, a ja kao šef Odjela ih podržavam jer nam je svima zajednički interes zdravo dijete i

zdrava porodica. I na ovim projektima sa Udruženjem radimo timski - sestre, ljekari i članovi Udruženja.

Udruženje nam pomaže da brže dođemo do dijagnoze, načinom da plati i odnese uzorak krvi u privatnu ambulantu i mi isti dan imamo dijagnozu, a to je veoma važno za što brže uključivanje terapije. Pomaže u nabavci lijeka kojeg trenutno nema i još mnogo toga što je važno za pacijenta. O načinu kako pomažu roditeljima bolesne djece, dovoljno je da svi dođu i vide kako se živi u Roditeljskoj kući našeg Udruženja.

Kada smo kod međusobne saradnje, presretna sam što ćemo se ove godine prvi put pojaviti na sastanku SIOP-a u Briselu, gdje će nas predstavljati specijalizant dr. A. Šabanović koja će, nakon položenog specijalističkog ispita za nekih devet mjeseci, početi aktivno raditi na našem Odjelu. Dr. Šabanović ide u Brisel u organizaciji Udruženja koje snosi troškove puta i smještaja, a ja sam joj pomogla da napravi kratko izlaganje šta mi radimo, kako radimo i kakve rezultate imamo. Ovo je prvi put da se u Evropi čuje glas nas ljekara, kako radimo i kakve konkretne rezultate imamo.

**UDRUŽENJE: Koji je Vaš savjet roditeljima čija se djeca liječe? Kako oni mogu doprinijeti boljem ishodu liječenja?**

**DR SAKIĆ:** Ja bih roditeljima savjetovala da imaju povjerenja u nas. Učinit ćemo sigurno sve što je u našoj moći. Liječenje je besplatno za sve naše pacijente i ide na teret Fonda solidarnosti, što olakšava roditeljima, a Udruženje im nudi besplatan smještaj kao u najluksuznijim hotelima i još mnogo toga. Jedan dio u liječenju je u rukama "viših sila" na koje se sigurno ne može uticati i, na žalost, takva djeca završe onako kako ne želimo ni ja, ni moji saradnici, a pogotovo roditelji.




## Važno je stati uz dijete i roditelje

U sklopu obilježavanja Međunarodnog dana djece oboljele i liječene od raka, udruženje "Srce za djecu oboljelu od raka" organizovalo je u Tuzli okrugli sto o temi Psihosocijalna podrška i pomoć djeci oboljeloj od raka i njihovim porodicama.

Sudionici okruglog stola bili su ljekari i medicinske sestre Odjeljenja za hematologiju i onkologiju, te predstavnici Zavoda za psihološku i socijalnu zaštitu UKC Tuzla, Ministarstava zdravstva, socijalnog rada i politike, obrazovanja i nauke, udruženja "Srce za djecu oboljelu od raka" oboljelu od raka i Udruženja PIPOL.

Razgovaralo se o značaju saradnje hematoonkoloških odjeljenja i udruženja roditelja i važnosti psihološke podrške i supervizije medicinskom osoblju hematoloških odjeljenja. Prezentovan je značaj psihosocijalne podrške djeci i njihovim najbližima tokom intenzivnog bolničkog liječenja i značaj psihološke podrške roditeljima tokom suočavanja sa teškom dijagnozom. Govorilo se o tome šta, za dijete i roditelje, predstavlja dugotrajna hospitalizacija, kako im pomoći da se lakše izbore sa opakom bolešću, te o značaju, potrebama i opravdanosti postojanja roditeljske kuće u Tuzli, kao i o pitanju školovanja djece u bolnici tokom intenzivnog bolničkog liječenja.





# Raste naše Drvo života



Međunarodni dan djece oboljele i liječene od raka, 15. februar, uvijek je dan pun radosti, jer za našu djecu i roditelje predstavlja pobjedu nad najvećim neprijateljem. Svake godine, ovaj dan obilježimo svečanom akademijom na kojoj se skupe sva djeca i roditelji koji su dobili svoje bitke. Ova je akademija već postala tradicija i ne bismo mogli zamisliti obilježavanje 15. februara bez nje.

Svečana akademija 2018. bila je izuzetno vesela, razigrana i nevjerovatna. Roditelji i djeca su se družili, smijali i radovali. Djeca su uživala u radionicama koje smo im pripremili zajedno sa našim velikim prijateljima iz organizacije "Srce puno osmijeha", čiji su ih volonteri nasmijavali i uveseljavali. Najveće oduševljenje izazvali su pjesma i ples, a mi smo uživali gledajući mališane kako trče, plešu i kako napokon uživaju u životu onako kako to zaista zaslužuju.

Na akademiji su nam gosti bili mnogi naši prijatelji, volonteri i donatori bez kojih ne bismo mogli realizovati mnogo naših projekata, bez čije podrške naši mališani ne bi imali sve ono što danas imaju, od Roditeljske kuće do bezrezervne pomoći Udruženja, kad je ona najpotrebnija. Svim srcem smo im zahvalni na podršci i na tome što s nama dijele našu tugu i našu radost, što su s nama i u dobru i u zlu.

Svečana akademija ponovo je bila i mjesto gdje smo roditeljima predstavili šta smo sve uradili u protekloj godini i koje su to vrijednosti koje Udruženje ljubomorno čuva i njeguje.

Naravno, najbitniji i najistaknutiji dio događaja jeste naše Drvo života na koje, svake godine, dodajemo nove zlatne vrpce sa imenima djece koja su uspjela izaći kao pobjednici iz velikih bitki koju su vodili. Novi heroji su lično, svojim ručicama, na drvo zavezali zlatne vrpce sa svojim imenima. Drvo života je simbol nade, novog početka, simbol najveće snage i upornosti, te simbol svih pobjeda koje će tek doći.



*Radovali smo se djeci i roditeljima, našim gostima i prijateljima, ali najviše malim herojima koji su sami upisali svoja imena na naše Drvo života*



# Jesmo li spremni za budućnost?



Lisabon je ove godine bio domaćin 9. CCI evropske konferencije roditelja djece oboljele od raka, bivših pacijenata kao i akademske zajednice. Udruženje Acreditar se zaista potrudilo da konferencija protekne u prelijepoj atmosferi, a imali smo i priliku da, na interesantan način, obiđemo Lisabon i vidimo njegove ljepote.

Učesnice ovogodišnje konferencije ispred našeg Udruženja bile su Lejla Kamerić, savjetnica Udruženja i Ajla Nizić, članica Mreže mladih liječenih od raka MladiCe BiH.

Tople riječi dobrodošlice uputile su Luisa Basset, članica Uprave CCI i Anita Kienesberger, predsjednica Uprave CCI Europe. Na konferenciji je bio i cijeli Upravni odbor CCI, na čelu sa Ruth Hofman iz Sjedinjenih Američkih Država.

Glavna tema konferencije je bila *Fit for the future - Spremni za budućnost*, pa je veliki broj prezentacija i interaktivnih sesija upravo i bio o toj temi.

Ono što bismo izdvojili svakako je prezentacija predsjednika The European Society for Paediatric Oncology (SIOP Europe ili SIOPE), uvaženog doktora Martina Schrappe, koji je govorio o novim trendovima u liječenju raka kod djece. Imali smo priliku vidjeti i video prezentaciju nove bolnice u Holandiji koja je napravljena s ciljem da osoblje stručno za tretiranje ovako rijetkih bolesti bude na jednom mjestu, ali i kao model za bolnice prilagođene različitim uzrastima i različitim potrebama.

Interaktivne sesije o temi *Šta grupe podrške znače za vas?* i *Budućnost CCI Europe* su bile odlično organizovane i svi učesnici su dali svoj doprinos u traženju odgovora.

Survivori, mladi liječeni od raka, imali su zasebne socijalne aktivnosti, kao i priliku da cijelo jedno popodne diskutuju odvojeno od ostalih učesnika o potrebama i načinu organizovanja, saradnji među grupama i podršci jedni drugima. Istakli su važnost osnaživanja mladih kako bi bili u stanju da lobiraju za bolje uslove i zdravstvene usluge za djecu i mlade nakon samog liječenja. Imali smo priliku čuti da su mladi liječeni od raka aktivno uključeni i u donošenje odluka, a u većini država su i ravnopravni članovi upravnih odbora.

## MEĐUNARODNI DAN DJECE OBOJELE OD RAKA

# Sva djeca moraju imati istu šansu

U Briselu su se, na poziv članice Evropskog parlamenta iz Italije Elene Gentile, okupili predstavnici roditelja, pacijenata, te ljekara kako bi poslali jedinstvenu poruku obilježavajući Međunarodni dan djece oboljele od raka. Poziv je dobila i savjetnica udruženja "Srce za djecu oboljelu od raka", naša Lejla Kamerić.


Iako rijetka bolest, pedijatrijski kancer je i dalje veliki problem u Evropi. Svake godine dijagnosticira se novih 35.000 slučajeva, a oko 6.000 djece ne se uspije izboriti s njim. Dvije trećine djece, koja uspješno završe liječenje, suočava se sa ozbiljnim kasnim posljedicama liječenja tokom cijelog života.

Lejla je, predstavljajući roditelje iz cijele Evrope, istakla da postoji velika razlika u procentu izlječenja, standardima liječenja između zemalja istočne i zapadne Evrope, te da se prilikom planiranja razvoja mora voditi računa o ovom aspektu. Djeca u cijeloj Evropi moraju imati ista prava - prije svega pravo na život.

Svi učesnici su se složili da pedijatrijski kancer mora imati prioritet u budžetu EU za istraživanje i zdravlje.

Član Uprave SIOPE (The European society for pediatric oncology) Gilles Vasal istakao je da zajednica pedijatrijskih onkologa, zajedno sa političarima, mora stremiti ka nula smrtnih slučajeva, nula kasnih posljedica.

Pored obilježavanja u Evropskom parlamentu, Lejla Kamerić je iskoristila priliku da se sastane i sa ambasadoricom BiH u EU Lidijom Topić-Bowen, koja se upoznala sa radom našeg Udruženja, te iskazala punu podršku našem radu.





SABINA DUMAN,  
GEŠTALT PSIHOTERAPEUT

## Umijeće je balansirati

Maligna bolest djeteta, od momenta postavljanja dijagnoze, tokom trajanja onkološkog liječenja i po završetku liječenja, predstavlja seriju stresnih, kriznih, nekada i traumatskih događaja koji pogađaju i oboljelu djecu, ali i njihove roditelje i članove uže i šire porodice.

Učestale hospitalizacije, invazivne medicinske procedure, posljedice kemo i radio terapije, nehrabrujući i loši dijagnostički nalazi i prognoze, predstavljaju mnogobrojne stresne situacije tokom onkološkog liječenja sa kojima se suočavaju i oboljela djeca, ali i njihovi roditelji.

### Emocionalno opterećenje

Reakcije djeteta na malignu bolest i liječenje, najvećim dijelom zavise od reakcija članova porodice, prije svega roditelja, porodičnih resursa i snaga za prevladavanje, ali i od porodičnog funkcionisanja prije bolesti. Za djecu, biti bolestan znači novu ulogu i mnogo promjena, kako na intrapersonalnom tako i na interpersonalnom planu.

Bolest djeteta, međutim, najviše pogađa roditelje, jer dijagnoza zloćudne bolesti u dječjoj dobi izuzetno je emocionalno opterećenje za djetetovu porodicu. Biti suočen sa dijagnozom maligne bolesti djeteta uzrokuje brojne psihološke, praktične i emocionalne poteškoće. Roditeljima je teško prihvatiti činjenicu da neizlječiva bolest ograničava, onemogućuje određene aktivnosti, normalan rast i razvoj i tim, za cijeli život, obilježava dijete i određuje njegovu budućnost.

Dijagnoza maligne bolesti i proces onkološkog liječenja uslovljavaju i mnogo promjena u porodici - bračni odnos roditelja se često zanemaruje i zapostavlja, porodični, roditeljski, lični planovi i prioriteti se mijenjaju, odnosi roditelja sa djecom se također mijenjaju, kao i odnosi između djece. Mijenja se svakodnevna porodična rutina.

Zbog svega toga, briga o mentalnom zdravlju roditelja i psihosocijalna podrška za porodice djece i mladih oboljelih od različitih malignih bolesti, predstavljaju dio sveobuhvatne brige.


### Diktira li bolest?

Posebna se pažnja pridaje savjetodavnom, odnosno psihoterapijskom radu s majkom, jer upravo ona, provodeći vrijeme uz bolesno dijete tokom liječenja, apsorbuje emotivna stanja i strahove svog djeteta i samim time prolazi kroz teška emotivna stanja vidljiva kroz nevjericu, osjećaj bespomoćnosti, straha, osjećanje ljutnje, teškoće sa spavanjem, ali i niz fizičkih reakcija - gubitak apetita, mučnine, probleme sa koncentracijom.

Umijeće je balansirati između ličnih strahova i istovremeno biti djetetov oslonac i izvor stabilnosti. Pored profesionalne pomoći, od velike važnosti je podrška i razumijevanje roditelja koji su bili u sličnoj situaciji.

Kompleksno, zahtjevno i neizvjesno onkološko liječenje znači da je život cijele porodice od početka bolesti i liječenja, ali i kasnije tokom perioda praćenja i kontrola, najvećim dijelom regulisan stanjem oboljelog djeteta.

Možemo zaključiti da je u odnosu sa roditeljima djece sa hematoonkološkog odjeljenja važno pokazati razumijevanje, toplinu, bliskost, podršku, toleranciju i otvorenost.



Dijagnoza maligne bolesti i proces onkološkog liječenja mijenja svakodnevnu porodičnu rutinu



## Pomoć treba i duši

*Psihosocijalna podrška treba biti sastavni dio onkološkog liječenja djeteta i porodice tokom svih faza, ali i nakon liječenja*

Djeca, onkološki pacijenti, tokom liječenja prolaze kroz težak životni period. Postavljanje dijagnoze maligne bolesti, početak liječenja, promjene spoljašnjeg izgleda, promjena dotadašnjeg načina života, gubitak sigurnosti i promjena uobičajenog funkcionisanja i različite medicinske procedure predstavljaju potencijalne opasnosti koje mogu da izazovu različita psihološka stanja kod djece i mladih.

Djeca uzrasta od nekoliko mjeseci do šest godina suočavaju se sa narušavanjem njihove rutine u ishrani, spavanju, igri u poznatom i sigurnom okruženju, a izražen je strah od medicinskih pretraga.

### Briga je previše

Najčešće reakcije djeteta u ovom uzrastu na bolne situacije tokom liječenja jesu plač, uznemirenost i povlačenje. Često su vidljivi i regresivni oblici ponašanja - dijete ponovo traži cuclu, tepa, javlja se noćno mokrenje koje je bilo regulisano prije postavljanja dijagnoze, sisa palac, ali i ispoljava ljutnju, posebno prema roditelju koji je uz njega tokom liječenja.

Kod djece uzrasta od sedam do deset godina, pored strahova od medicinskih intervencija, prisutna je i briga zbog izostajanja iz škole, nemogućnosti druženja s vršnjacima, kao i patnja u vezi sa promjenom tjelesnog izgleda, ovisno o dijagnozi i fazi liječenja.

Tinejdžeri i adolescenti se suočavaju sa promjenama raspoloženja, negativnim emocijama, te problemima u vezi sa samopoštovanjem i samopouzdanjem.

### Učiti i opustiti se

Udruženje "Srce za djecu oboljelu od raka", vodeći se preporukama Evropskog udruženja pedijatrijskih onkologa, SIOPA, koje predlaže da psihosocijalna podrška bude sastavni dio onkološkog liječenja djeteta i porodice tokom svih faza, ali i nakon liječenja, u periodu rehabilitacije i resocijalizacije djeteta i porodice, organizuje radionice za djecu kao oblik grupnog psihološkog rada. Tu, kroz osmišljene igre, stječu nova pozitivna iskustva, koja djeci i mladima koji su u stanjima krize, šoka, omogućava nove uvide, uz osnaživanje i podsticaj kvalitetnog prevladavanja teškog životnog iskustva maligne bolesti i liječenja, što dovodi do prevazilaženja zastoja i regresije i podsticanja daljeg psihološkog razvoja.

Radionice se realiziraju u igraonici na odjeljenju ili u bolesničkim sobama, a njihova struktura ovisi o uzrastu pacijenta, ali i postavljenom cilju.

Dijele se na edukativne i kreativne, a zajednički cilj im je uspostava emocionalne stabilnosti, prepoznavanje neprijatnih emotivnih stanja, ojačavanje samopouzdanja i samopoštovanja, razvijanje povjerenja u druge, poboljšanje komunikacije i, svakako, opuštanje i relaksacija, uz dosta zabave, smijeha, uživanja i veselih boja.



# Kamp je više od obične igre

Terapeutska rehabilitacija i rekreacija djece i omladine, koja se suočavaju sa dugotrajnim hroničnim posljedicama liječenja od malignih oboljenja, pokazala se najefikasnijom na nadmorskim visinama od 1.100 do 1.800 metara, jer ova visina ima stimulativne efekte na **eritrocitopoezu** (proces stvaranja zrelih eritrocita), **trombocitopoezu** (proces stvaranja trombocita u koštanoj srži) i **stvaranje hemoglobina**. Dugotrajno liječenje ostavlja velike posljedice na organizam i krvnu sliku, tako da je rehabilitacija i rekreacija na povoljnoj nadmorskoj visini imperativ za što efikasniji oporavak i neizbježna preporuka naših ljekara.

Boravak na planini pruža cjelodnevnu **helioterapiju** koja blagotvorno utiče na psihofozičko zdravlje, zarastanje rana, atopijski dermatitis i probleme sa raspoloženjem i spavanjem - što su sve dugotrajne posljedice liječenja od malignih oboljenja.

## Terapeutska rekreacija i rehabilitacija

Stopa preživljavanja u modernoj pedijatrijskoj onkologiji kod nas prati svjetske trendove i kreće se oko 80 odsto, ali nova istraživanja pokazuju da emocionalne i psihološke posljedice imaju puno dalekosežniji i dublji uticaj na ukupno zdravlje djece.

Djeca oboljela od raka često su lišena mnogih elemenata normalnog djetinjstva, dok prolaze kroz dug i težak proces liječenja od ove teške bolesti. Dugotrajno izostajanje iz škole, prekinuta prijateljstva i neizbježan boravak u bolnici, u izolovanom okruženju, duboko utječe na djecu, mlade ljude i, posljedično, na njihove porodice.

Međutim, nedavno istraživanje na Medicinskom fakultetu Univerziteta Yale u Sjedinjenim Američkim Državama ukazuje na to da terapeutske centri / kampovi mogu da doprinesu emocionalnom i psihološkom oporavku takve djece.

Takvi centri bazirani su na programu i **modelu terapeutske rekreacije** u kombinaciji sa nenametljivim medicinskim nadzorom i za cilj imaju zdravstveno i psihološko jačanje i osnaživanje djece i čitavih porodica. Uporište za ovakav model

rehabilitacije nalazi se u snažnom uvjerenju da svako dijete sa hroničnim oboljenjem treba da uživa u svom djetinjstvu.

Ovakav model rehabilitacije primjenjuje 30 kampova iz Serious Fun Network (<https://seriousfunnetwork.org>), globalne porodice kampova i programa za djecu i porodice koji su se suočili sa nekim teškim oboljenjem. Naš kamp, koji uspješno provodimo na planini već 11 godina, programski nimalo ne zaostaje za svjetskim kampovima.

## Terapeutska rekreacija

Terapeutska rekreacija je program koji ima za cilj da djeca, njihovi braća i

*Centri bazirani na programu i modelu terapeutske rekreacije mogu pomoći zdravstvenom i psihološkom jačanju i osnaživanju djece i porodica*

način, u okruženju koje je fizički i emocionalno sigurno i podržano.

**USPJEH** Svaki izazov je popraćen i određenim uspjesima. U ovom koraku, zadatak je uspješno napraviti sigurno fizičko i emocionalno okruženje, biti obazriv prema drugim učesnicima, uspostaviti uspješnu komunikaciju sa voditeljima aktivnosti, tražiti podršku kad god je to potrebno, stvoriti nekompetitivnu atmosferu, te prilagoditi se aktivnostima.

**KONTEMPLACIJA** U ovom dijelu je bitno povezati iskustvo sa emocijama. Osvrtanje na integrisano iskustvo je ključ do podizanja samopouzdanja i učenja o sebi. Uloga voditelja, u ovom dijelu, je da razgovaraju sa učesnicima, kako bi se postigla validacija i svijest da su oni napravili taj uspjeh.

**OTKRIĆE** Kao i svaki od ovih segmenata, i ovaj je dio je individualan i zaseban za svakog u kampu. Cilj kampa je da svako dijete i odrasli steknu iskustva iz kojih će naučiti nešto novo o sebi i svojim sposobnostima. Ta nova iskustva se mogu podijeliti sa vršnjacima, rođacima, sa braćom i sestrama. Čak i ako se to ne dogodi u vrijeme trajanja kampa, to je sasvim u redu. Učenje o sebi kroz iskustvo ima svoj tempo i tu se ne postavljaju limiti. Učestvovanje u prethodna tri koraka je samo po sebi učenje i otkrivanje koje je neizbježno.

**ZABAVA** Najvažnije je spomenuti da su sve aktivnosti i svi pomenuti koraci osmišljeni kroz zabavu. Kamp je iskustveno učenje kroz zabavu i jedno nezaboravno iskustvo.



## TERAPEUTSKA REKREACIJA PROTIV BOLESTI

### Život kod kuće nakon dijagnoze

**1**

- IZOLACIJA
- STRAH RANJIVOST
- TUGA
- REZIGANCIJA MALODUŠNOST
- PESIMISTIČNA / NEGATIVNA VIZIJA BUDUĆNOSTI
- BESPOMOĆNOST
- PREKID / GUBITAK KONTAKTA SA PRIJATELJIMA
- GUBITAK KONTROLE

### Doživljaji na kampu koji nudi terapeutsku rehabilitaciju

**2**

- POMJERANJE GRANICA
- SIGURNO OKRUŽENJE
- POZITIVNE REAKCIJE
- IZAZOVI
- BOLJE SUOČAVANJE SA BOLEŠĆU / STANJEM
- DOŽIVLJAJ RADOŠTI I USPJEHA
- PRILIKA ZA SKLAPANJE PRIJATELJSTAVA
- SMANJENJE IZOLACIJE

### Iskustva nakon kampa koji nudi terapeutsku rehabilitaciju

**3**

- VJERA U OZDRAVLJENJE
- PRIHVATANJE NOVIH IZAZOVA
- POVEĆANJE SAMOPOUZDANJA I SAMOPOŠTOVANJA
- SVIJETLA BUDUĆNOST
- SARADNJA
- UKLJUČIVANJE U GRUPU VRŠNJAKA I AKTIVNO TRAŽENJE PRIJATELJA
- POVEĆANE FIZIČKE I PSIHIČKE SPOSOBNOSTI
- POVRATAK KONTROLE



## Nastaviti život nakon bolesti



*Mislili smo da ćemo prenijeti iskustva, a iskustva smo ponijeli. Osmijesi, snaga i volja ovih mladih i hrabrih boraca, pojasnili su nam neke životne dileme poručili su nam biciklisti iz Viteza*

Kakva je to samo zabava bila, i za djecu i za roditelje! Od 31. jula do 5. augusta 2018. naš tradicionalni rehabilitacioni kamp na Vlašiću ugostio je rekordan broj mališana, roditelja, volontera, animatora, gostiju i prijatelja iz cijele Bosne i Hercegovine.

Udruženje "Srce za djecu oboljelu od raka" već 11 godina posebno osmišljava program rehabilitacije za djecu oboljelu i liječenu od raka, te njihove roditelje. Program je besplatan, uključuje smještaj, hranu, posebno osmišljene aktivnosti i medicinsku skrb. Rehabilitacioni kamp je financiran iz donacija, grantova i aktivnosti Udruženja.

### MladiCe kao uzor

Na 11. rehabilitacionom kampu "Vlašić 2018.", oko 85 mališana koji su izliječeni od raka i 60 njihovih roditelja prošlo je procese rehabilitacije, resocijalizacije i druženja, prijeko potrebnih nakon dugotrajnog liječenja i izolacije koju je zahtijevalo samo bolničko liječenje.

Ciljevi ovogodišnjeg kampa bili su jačanje imuniteta, otpornosti i fizičke izdržljivosti djece, psihosocijalno jačanje, jačanje samopouzdanja, samopoštovanja i uključivanje u grupu vršnjaka, povećanje nezavisnosti, samouvjerenosti, otvorenosti prema

novim stvarima i iskustvima, socijalno jačanje - pozitivan utjecaj grupe, resocijalizacija i povratak u matičnu sredinu, smanjenje stresa, anksioznosti, poticanje kreativnog izričaja i pozitivnog stava, jačanje porodičnih veza, te podizanje svijesti o dječijem raku i posljedicama liječenja.

Vrijedni tim Udruženja, zajedno sa volonterima i prijateljima, pripremio je veliki broj posebno osmišljenih aktivnosti kroz koje su uspjeli postići zadate ciljeve.

Posebno smo ponosni na činjenicu da smo u ovom jedanaestom izdanju kampa imali 20 volontera koji su pomogli da se djeca što bolje osjećaju i zabave. Većina volontera su naši mladi liječeni od raka, koja djeluje pri Udruženju u grupi MladiCe. Oni redovno volontiraju u Udruženju, pozitivan ishod njihove borbe sa rakom dobar je primjer i motiv djeci i roditeljima koji se trenutno bore sa teškim oboljenjem. Oni su dokaz i primjer da je rak kod djece izlječiv i da je moguće iz te borbe izaći kao pobjednik. Nerijetko ih dječica gledaju kao starije, odrasle sestre i braću i oni našim novim gostima u kampu postaju uzor. A to je još jedna jaka karika u lancu rehabilitacije i nastavka života nakon bolesti.



"Vlašić 2018." iznjedrio je u svojim posebnim školama uspješne nove plivače, jahače, brdske bicikliste, male grnčare i keramičare, stvaraoce nakita i čestitki, djecu koja se bave teatrom, a osim tih škola imali smo interaktivne i edukativne radionice za male graditelje i male genijalce.

Vrijedne ručice naše dječice u kampu izradile su mnogo neprocjenjivih umjetničkih djela, koja su izložena i ponuđena na prodaju tokom završnog Humanitarnog bazara. Tom prilikom prikupljeno je blizu 1.000 KM. Sredstva su namijenjena za nabavku i kupovinu repromaterijala za buduće aktivnosti i radionice u kampu.

Uz neizbježnu zabavu i veselu ciku i graju djece, nismo zaboravili ni roditelje. Ovogodišnje izdanje kampa obilježile su zanimljive i korisne fizikalne vježbe i masaža, te pilates za mame, branje ljekovitog bilja, individualni razgovori sa ljekarom, dva psihologa i socijalnim radnikom, grupna psihoterapeutska radionica, te nevjerojatno ukusna nutricionistička radionica.

### Ne može bez prijatelja

Novim sadržajima obogatili smo i proširili ponudu za roditelje i to je nešto na čemu ćemo i dalje raditi.

Kruna našeg petodnevnog kampa je dodjela medalja našim hrabrim mališanima, volonterima i vrijednim rukama Udruženja, uz druženje, pjesmu i pregršt smijeha. I u ovom kampu imali smo iznenađenje. Bila je to premijera dječije teatarske predstave "Snjeguljica i sedam patuljaka", koju su sa MladiCama, potpuno samostalno, pripremili naši mališani iz kampa. Ne postoje riječi kojima se može opisati njihov ponos i sreća zbog tog uspjeha.

Mi smo sretni što smo na ovom kampu uspjeli ispuniti svoje ciljeve, što smo uspjeli dobiti mnogo, mnogo osmijeha i potaknuti neka nova iskustva. Što smo uspjeli napraviti očigledne promjene koje nisu mogle proći nezamijećeno.

Donatori ovogodišnjeg kampa, bez kojih njegova realizacija ne bi bila moguća, su Ministarstvo zdravlja FBiH, Hotel Pahuljica Vlašić, Globtour d.o.o. Međugorje, Sarajevo osiguranje d.d. i JOB Unija veterana BiH sekcija BH Telecom, sekcija Direkcije Sarajevo.

Posebnu zahvalnost dugujemo i prijateljima Udruženja, koji su svojim volonterskim radom i izdvojenim vremenom i znanjem, doprinijeli programskim aktivnostima kampa sportskim animatorima Senadi

11. REHABILITACIONI KAMP VLAŠIĆ 2018

Ablaković, Lejla Telarević, Anesu Hamidović i Dženet Boja; za fizikalnu terapiju i masažu pobrinuli su se Samir Hožbo i Adela Erović; malim graditeljima u 3D modeliranju pri ruci se našao Emir Salkić i njegov tim iz Normal arhitekture; malu školu grnčarstva i keramike organizovala je Tatjana Kovačević-Vidović iz TAKO keramike; a nutricionističku radionicu Maja i Irma Pilav iz Maki Makarona.

Škola brdskog biciklizma bila je doprinos Biciklističkog kluba Vitez; škola jahanja Jahačkog kluba Mustang iz Travnika; škola plivanja Plivačkog kluba SPID iz Sarajeva; a Taekwondo klub Bosna iz Visokog organizovao nam je pokaznu vježbu. Za grupnu psihoterapeutsku radionicu pobrinula se psihoterapeutkinja Armina Čerkić iz USPIT-a. S nama su bili i fotografkinja Aida Redžepagić, pedijatrica mr. med. sc. dr. Lejla Dostović Hamidović iz UKC Tuzla; medicinska sestra Bisera Pandžić iz UKCS Sarajevo, menadžer Hotela Pahuljica, Sead Deljić, direktor JU Bolnica Travnik, prim. dr. Mirsad Granov, direktorica FK Sarajevo, Sabrina Buljubašić i izvršna direktorica AmCham BiH, Violeta Čibukčić.

“Mi smo njih učili kako biciklom pobijediti težak uspon, a oni nas, nesvjesno, kako pobijediti opasnu malignu bolest. Mislili smo da ćemo prenijeti iskustva, a iskustva smo ponijeli. Osmijesi, snaga i volja ovih mladih i hrabrih boraca, pojasnili su nam neke životne dileme. Ponosni smo što smo bili dio ove priče”, poručili su nam biciklisti iz Viteza.



11. REHABILITACIONI KAMP VLAŠIĆ 2018



# Drugovi su tu kad zatrebaju

Na dvije donatorske večeri prikupljeno blizu 55.000 KM - 17 porodica dobilo direktnu pomoć u najtežim trenucima



U aprilu 2018. godine, udruženje "Srce za djecu oboljelu od raka" steklo je novu veliku prijateljicu, Renatu Savić. Ona je, na jedan divan i specifičan način, uspjela animirati svoj krug poznanika i poslovnih partnera i prikupiti direktna finansijska sredstva za porodice čija su se djeca, u tom trenutku, liječila od raka i kojima je podrška bila najpotrebnija.

Renata je, zajedno sa svojom i našom velikom prijateljicom Amelom Ivković O'Reilly i uposlenicima Udruženja, uspješno organizirala prvu od dvije donatorske večere.

## Nejrine pjesma i priča

Prva, aprilska donatorska večer, u sarajevskom restoranu Duett Bistrot, bila je divno okupljanje mnogo plemenitih i karizmatičnih ljudi koji su došli samo s jednim ciljem: da budu podrška malim herojima. Te večeri Udruženje je ispričalo svoju priču, a upriličena je i aukcija na kojoj je bilo ponuđeno mnogo umjetničkih djela i veoma korisnih vaučera. Gosti večere su svojim doprinosom, kupovinom ulaznica i licitiranjem na aukciji, prikupili oko 15.000 KM. Cjelokupan iznos podijeljen je na 5 dijelova i dodijeljen porodicama mališana koje su bile u najvećoj potrebi.

Priča o ovom prijateljstvu tu nije završila. Renata Savić potrudila se i oko druge, novembarske donatorske večeri, koja je podignuta na jedan viši nivo uz pomoć televizije TV1 i nekoliko kompanija koje su donirale veće iznose novca. Ova donatorska večer prenošena je uživo u programu TV1, uz profesionalnu organizaciju i veliki trud i zalaganje kolektiva televizije.

Atmosferu večeri upotpunila Ammara Mistrić svojim magičnim glasom i pjesmom. Svoj najnježniji glas pustila je i naša MladiCa, Nejra Musić, koja je prisutne uveselila svojom pjesmom, a dirnula svojom pričom o snazi i borbi kroz koju je prošla.

Najzanimljiviji dio večeri, po mišljenju mnogih, bila je aukcija koju je vodio neizostavni Enis Bešliagić, veliki prijatelj Udruženja, koji je uvijek tu kada nam zatreba. Aukcija je bila očekivano zabavna, puna Enisovih dosjetki i šala, a donatori su uživali. Svoju su pozitivnu energiju, na neki način, prenijeli i na porodice. Veliko oduševljenje izazvalo je i video javljanje bh. reprezentativca, Miralema Pjanića,

koji je rekao da žali što je spriječen da te večeri bude u Sarajevu sa roditeljima i djecom, ali da je uvijek uz njih, makar bio i hiljadama kilometara daleko.


## Na njih možemo računati

U donatorsku večer mogli su se uključiti i bh. građani pozivom na humanitarni broj Udruženja, a pokazalo se da je cijela Bosna i Hercegovina uz djecu oboljelu od raka i da na Bosance i Hercegovce uvijek možemo računati. Ova večer je ponovo podsjetila koliko je bh. društvo osviješteno i koliko su ljudi uvijek spremni da priteknu u pomoć onda kada je najpotrebnije.

Zahvaljujući gostima na večeri, te pozivima mnogobrojnih građana iz BiH, prikupljeno je blizu nevjerovatnih 40.000 KM. Cjelokupan iznos usmjeren je na 12 porodica djece koja se liječe od raka, kako u BiH tako i u inostranstvu.

Cilj obje donatorske večeri, da se finansijski pomogne porodicama djece oboljele od malignih oboljenja i da im se što više olakša teški proces koji moraju proći, u potpunosti je ispunjen.

Zahvaljujemo se Renati Savić i njenim prijateljima, ekipi TV1, brojnim donatorima - građanima i kompanijama, Enisu Bešliagiću i svim našim velikim prijateljima koji su omogućili da imamo dvije ovako uspješne noći u godini, koje su doprinijele kvalitetnijem životu naših mališana i njihovih porodica. A zahvalnost i olakšanje koje smo osjetili među roditeljima najveća su nagrada koju smo mi mogli dobiti i najveći podsticaj da se nastavimo boriti i pomagati svim snagama.



# Nema čekanja, akcija traje



Lions Club International Foundation, LCIF, najveća je svjetska volonterska organizacija, koja ima više od 1.400.000 članova i koja je 2018. godine proslavila 100 godina postojanja. U Bosni i Hercegovini, LCIF je prisutna od 1996., kada je osnovan prvi Lions Klub u Mostaru.

LCIF je poslije rata učestvovao u brojnim razvojnim projektima i pomagao u izgradnji infrastrukture, raseljenim licima i stanovništvu pogođenom prirodnim nepogodama, distribuirajući više od 12 miliona KM pomoći.

Trenutno je u Bosni i Hercegovini šest Lions klubova - Prvi ženski Lions klub, Lions klub Centar Sarajevo, Lions klub Tuzla, Lions klub Olimpijski grad, Lions klub Banja Luka i Leo klub Tuzla. Njihova je misija pružanje pomoći i podrške u nekoliko tematskih polja koja su definirana statutom LCIF-a: slijepi i slabovidni, mladi, elementarne nepogode, glad, dijabetes, ekologija i, od 2018. godine, djeca oboljela od raka.

LCIF je 2018. potpisao Memorandum o saradnji s Childhood Cancer International (CCI), najvećom svjetskom krovnom organizacijom na polju dječjeg raka. Lionsi Sarajeva nisu gubili ni časa: Klub Centar, predvođen dr. Mehmedom Kundurovićem, jednim od osnivača Lions mreže u BiH, osmislio je akciju "Mobilni tim",

čiji je cilj osnivanje i opremanje tima profesionalaca, koji će psihosocijalne usluge udruženja "Srce za djecu" pružati na području cijele Federacije BiH.


Prva faza provedbe ovog projekta bilo je prikupljanje sredstava za opremanje tima - konkretno, za nabavku kombija i medicinske opreme.

Uz pomoć Prvog Ženskog kluba, donatorska večer organizirana je 13. aprila 2018. u restoranu Zelena dolina. Na večeri je bilo oko 50 gostiju, a održana je i aukcija vina "Carska vina" - Grga Vasilj, te aukcija slika koje su Udruženju donirali akademski slikari. Za sjajnu atmosferu pobrinuli su se voditelj Emir Cocalić, odlični Trio Grifon, te kuhari Zelene doline sa vrhunskim specijalitetima.

Projekat mobilnog tima će podržati i centrala LCIF-a u Chicagu. Ona će duplirati sredstva koja prikupe Lions klubovi iz Sarajeva. Početak rada Mobilnog tima udruženja "Srce za djecu" planiran je za mart 2019.

Koristimo priliku da se od srca zahvalimo sjajnom dr. Mehmedu Memi Kunduroviću na nesebičnom zalaganju u kreiranju i implementaciji ove akcije, te svim članovima Lions kluba Centar i Prvog ženskog Lions kluba, uz lionistički pozdrav: We Serve!

Početak rada Mobilnog tima udruženja "Srce za djecu oboljelu od raka" planiran je u 2019. godini.



# Međunarodna zajednica u Bosni i Hercegovini



Drugu godinu zaredom učestvovali smo na Diplomatskom zimskom bazaru i povodom toga posjetile su nas supruge predstavnika diplomatskih misija u BiH kako bi, između ostalog, vidjele gdje su i na koji način utrošena sredstva od donacije sa prošlog Diplomatskog bazara u iznosu od 20.000 KM. Iz Roditeljske kuće su ponijele velike osmijehe, pregršt emocija i pozitivan utisak te nas pozvale da ponovo učestvujemo na Diplomatskom zimskom bazaru 2018, koji je održan 01. decembra 2018. u KSC Skenderija. Tom prilikom prikupljeno je nevjerovatnih 210.000 KM od kojih je Organizacioni odbor Diplomatskog Zimskog Bazara, za Roditeljsku kuću u Tuzli, izdvojio 25.000 KM.

MladiCe su bile tu kako bi zainteresovanim posjetiocima na štandu predstavile rad Udruženja i načine na koje oni mogu pomoći. Ove godine štand Udruženja bio je obojen u zlatno, simbolično predstavljajući zlatnu vrpču kao znak borbe protiv dječjeg raka.

Druga pozitivna priča nam dolazi iz Microsofta. Naime, predstavnici Microsofta Bosne i Hercegovine su posjetili Roditeljsku kuću i donirali 7000 \$. Poneseni pozitivnim emocijama kojima su bili okruženi u Roditeljskoj kući izrazili su svoje divljenje kako prema djeci i porodicama radi njihove hrabrosti i snage, tako i prema Kući koja predstavlja njihov drugi dom.



Kantoni iz kojih su boravile porodice su:



**2018.**

U 2018. godini usluge Roditeljske kuće je koristilo ukupno **164 porodice** \*50 jedinstvenih boravaka

**465 korisnika**

Ukupan broj korisnika u 2018. godini (dijete, roditelji, braća/sestre, nane, tetke)

**Najduži boravak** u Roditeljskoj kući u toku 2018. godine bio je **142 dana** od toga, u kontinuitetu, bez dana odlaska kući 92 dana

Na raspolaganju su **DVA RODITELJSKA STANA** za djecu i roditelje u Sarajevu i Tuzli

Nakon temeljite obnove i uređenja **AMBULANTE U TUZLI** u novembru 2018. godine, više od 50 djece oboljele od raka prošlo je kontrolne preglede i proces praćenja

Podsjećamo, Roditeljska kuća otvorena je 26. aprila 2016. godine sa ciljem da pruži kontinuiran i nesmetan boravak oboljele djece i njihovih roditelja/najbližih srodnika u Sarajevu, tokom liječenja na Hematoonkološkom odjeljenju Pedijatrijske klinike Jezero. Udruženje takođe, u sklopu Roditeljske kuće, pruža usluge psihosocijalne pomoći i podrške. Korisnici na raspolaganju imaju stručnu pomoć psihologa, socijalnog radnika i pedagoga, te okupacione radionice za roditelje i kreativne (likovne, muzičke, obrazovne) radionice za djecu.

Pripremila: Jasna Vatreš, dipl. socijalni radnik

**Uskoro početak izgradnje RODITELJSKE KUĆE U TUZLI!**



# Prijatelji Roditeljske kuće

Roditeljska kuća je u 2018. godini pisala posebno lijepe priče, a sve da bi se naši hrabri roditelji i još hrabriji mališani osjećali što ugodnije dok vode svoje teške bitke za ozdravljenje.

Lijepa bijelo-plava kuća u krugu Pedijatrijske klinike Jezero pruža oboljeloj djeci i njihovim porodicama drugi dom, porodičnu atmosferu i mjesto na kojem, bar na trenutak, mogu zaboraviti na bolničko liječenje.

Udruženje "Srce za djecu oboljelu od raka" od maja 2018. pokrenulo je inovativan i posebno osmišljen program samoodrživosti Roditeljske kuće i pozvalo je domaće i strane kompanije, vladin i nevladin sektor, te pojedince da budu dio naše priče o uspjehu.

Program pokroviteljstva nad apartmanima "Prijatelj Roditeljske kuće" podrazumijeva pokrivanje troškova smještaja porodica, režija, održavanja apartmana, sredstva za higijenu i dezinfekciju, te pomoć psihologa i socijalnog radnika u periodu od jedne, dvije ili tri godine.

U kratkom vremenu, mnogo kompanija i pojedinaca su ponosno ponijeli epitet prijatelj Roditeljske kuće i zaštitnički stali na stranu oboljele djece i pravih društvenih vrijednosti.

**START**



## Telemach i Džeko

Telemach i kapiten fudbalske reprezentacije BiH, Edin Džeko, su za pokroviteljstvo izabrali "Start", apartman broj 1, i na taj način simbolično startali sa pričom koja je inspirisala mnoge. Za jednogodišnje finansiranje jednog apartmana treba 10.000 KM, a ugovor sa Telemachom i Džekom je potpisan za naredne tri godine.

"Svaka moja posjeta Roditeljskoj kući izaziva posebnu emociju. Upoznao sam mnogo djece, njihovih roditelja koji se konstantno bore i ovo je samo mali znak pažnje kojim želimo olakšati njihovu borbu. Oni znaju kroz šta prolaze i koliko im je teško, dijelimo njihovu bol i kao društvo moramo stati iza njih. Neko će to uraditi novcem, neko običnom posjetom, neko osmijesima, nebitno, jer to je najmanje što možemo. Inicijativa Telemacha da pomogne radu Roditeljske kuće je za svaku pohvalu, sretan sam što sam dio ove priče i pozivam i druge da daju svoj doprinos", riječi su Edina Džeke, koji je i zaštitno lice kompanije Telemach.



**CIK CAK**



## Malak i Džumhur

Hotel Malak Regency i naš najbolji teniser Damir Džumhur izabrali su da budu pokrovitelj apartmana broj 8 "Cik-cak", koji nas podsjeća na to da se mnogo napora mora uložiti i mnogo prepreka prevazići da bismo došli do konačne pobjede, kako u poslu, tenisu, tako i u borbi sa dječijim rakom. Podsjeća nas, također, na to da na tom svom putu nismo sami, da smo jedni drugima velika podrška.

Neraskidiva veza između nas i naših najboljih sportista je dokazani prijatelj djece i Roditeljske kuće - **Jasmin Ligata**.



društvene zajednice, krov koji štiti djecu oboljelu od raka i njihove porodice.

## Raiffeisen banka

"Cijeneći izuzetno humanu misiju Roditeljske kuće, istinski nam je drago što možemo podržati njen rad i dati doprinos procesu liječenja malih heroja koji u njoj borave. Roditeljska kuća za ove mališane i njihove roditelje predstavlja mjesto gdje osjećaju da u najtežim trenucima nisu prepušteni samima sebi i da mogu dobiti bitku koja život znači. Mi nastavljamo podršku ovog plemenitog projekta kako finansijski, tako i kroz volonterske aktivnosti uposlenika Raiffeisen banke. Ove godine smo za rad Roditeljske kuće donirali 20.000 KM", izjavio je Karlheinz Dohnigg, predsjednik Uprave Raiffeisen banke, te dodao da je cilj Raiffeisena nastaviti s podrškom koja je u skladu sa strateškim opredjeljenjem banke da učestvuje u projektima koji su namijenjeni najosjetljivijim segmentima društvene zajednice.

Pokroviteljstvom apartmana "Kockica", Raiffeisen banka će doprinijeti da se sve kockice poslože i da se obezbijedi



**STUB**



sigurno funkcionisanje drugog doma za djecu koja se bore sa rakom i njihove porodice.


## Vakufska direkcija i Kuvajt

Značaj postojanja Udruženja i izgradnje Roditeljske kuće prepoznali su od samog početka i Vakufska direkcija Islamske zajednice u BiH i njeni partneri iz Kuvajta, a odlučili su i dalje biti jedan od stubova podrške i oslonac za djecu oboljelu od raka i njihove porodice. Sredinom 2018. donirali su 50.000 KM i postali pokrovitelji sobe "Stub" na period od tri godine, a u Fond za liječenje djece oboljele od raka dali su dodatnih 60.000 KM.

"Namjeravamo nastaviti podržavati ovaj projekat zato što se radi o jednoj od najugroženijih kategorija bh. društva. Presretni smo da nam je ukazana prilika da budemo jedan od prijatelja Roditeljske kuće, a s obzirom na to da se radi o projektu koji je sam po sebi trajno dobro, najbolji način da ostanete u sjećanju ljudi i nakon smrti jeste da dotaknete njihova srca i omogućite im ono što im je potrebno na ovom svijetu. Mi se nadamo da ćemo ostati u sjećanjima ovih ljudi i ove djece, pogotovo onih koji su izliječeni", rekao je dr. Senaid Zajimović, direktor Vakufske direkcije.

Ovih 110.000 KM je, kaže on, "samo primjer kako možemo stojati uz ljude kojima je to potrebno, uz roditelje, uz njihovu djecu i nadamo se da kao što nismo stali ni na izgradnji Roditeljske kuće i njenom opremanju, nećemo stati ni sa održavanjem ni jednog apartmana".

"Vlada Države Kuvajt i kuvajtske humanitarne organizacije svojim aktivnostima pokazuju bezrezervnu podršku Bosni i Hercegovini i njenim građanima", izjavio predstavnik Ambasade Države Kuvajt Ajeel Alahmad.





**MORE**

## Grawe osiguranje

Krajem oktobra 2018., predstavnici GRAWE osiguranja posjetili su udruženje "Srce za djecu oboljelu od raka" i Roditeljsku kuću, pa uz druženje sa roditeljima i djecom ozvaničili dugogodišnje prijateljstvo preuzevši pokroviteljstvo nad apartmanom "More". Donacija GRAWE osiguranja od 10.000 KM osigurat će sigurno utočište i mirno more porodicama i djeci koja dolaze u Sarajevo na liječenje u narednoj godini. GRAWE je prijatelj na kojeg se može osloniti u svakom trenutku, što su, tematskom radionicom posebno osmišljenom za njih, uposelnici ove kompanije pokazali djeci.



**TETRIS**

## Fudbalski klub Sarajevo

Roditeljska kuća, koja predstavlja jedan od najhumanijih projekata na području BiH svojom namjenom i svime onime što znači porodicama koje borave u njoj, ima mnogo prijatelja, a jedno od najdužih prijateljstava je i ono sa Fudbalskim klubom Sarajevo. Naše drage komšije odlučile su pružiti ruku podrške djeci oboljeloj od raka i njihovim najbližima i učestvovati u projektu "Prijatelj Roditeljske kuće", pa će, u naredne tri godine, Uprava i igrači FK Sarajevo, u čije ime je ugovor potpisala direktorica kluba, Sabrina Buljubašić, simbolično slagati kockice dobrote i čvrste volje, a samim tim i najbolju kombinaciju za dobrobit djece oboljele od raka i njihovu što bržu pobjedu i brži oporavak.



**NEBO**

## Prijatelji iz Evrope

Koliko je veliki i vrijedan, pokazuje i to što je projekat "Prijatelj Roditeljske kuće" izašao iz okvira BiH: Bosanci i Hercegovci širom Evrope su se ujedinili kao Prijatelji iz Evrope, skupili novac i zajednički odlučili da jednu godinu budu pokrovitelji apartmana "Nebo". Tako su pokazali da im ni nebo nije granica, kada treba pomoći djeci oboljeloj od raka. Dokazali su svojim gestom da pod ovim plavim nebeskim svodom, gdje god to bilo, postoje ljudi dobrog i velikog srca koji nisu isključivo okrenuti sebi nego su njihove oči uprte u druge, njihove misli putuju prema onima kojima je podrška potrebna, njihova djela su namijenjena plemenitom cilju.



**VISIBABA**

**KUĆICA**

## BH Telecom i Pjanić

BH Telecom i fudbalski reprezentativac BiH, Miralem Pjanić, pokrovitelji su apartmana kojeg zovemo "Visibaba" i na taj način simbolično najavili rađanje još čvršćeg prijateljstva i bezuslovne podrške.

Osnovna sindikalna organizacija Generalne direkcije BH Telecoma i radnici BH Telecoma su izabrali da budu pokrovitelji apartman "Kućica" koji simbolizuje brigu



# Dvorište nam je jednako važno!

Koliko nam je važna Roditeljska kuća, toliko nam je važna i njena okolina. Važno nam je da njeno dvorište bude lijepo, uredno i uvijek ukrašeno mekanom travom. Djeca, a i odrasli vole provoditi slobodno vrijeme u tom dvorištu, u parkiću, naročito ljeti. Igra čini da djeca zaborave teške trenutke koje proživljavaju, a njihovi osmijesi uveseljavaju roditelje i olakšavaju im taj težak životni period.

Stoga mnogo truda ulažemo u okolinu Roditeljske kuće.

Pored svakodnevnih poslova po dvorištu, prošle godine imali smo i tri velike akcije koje su doprinijele da dvorište i park izgledaju još ljepše i još svježije i čistije.

Naši vrijedni roditelji i MladiCe su udružili snage i pokosili i uredili zelenu površinu oko Roditeljske kuće.

Vidljiv rezultat ostavile su i volonterske aktivnosti, posebno zaposlenika Raiffeisen Banke koji su presadili sadnice i uredili dvorište oko Kuće. Volonterske aktivnosti su dio Raiffeisen strategije održivosti u skladu s kojom Banka kontinuirano nastoji dati doprinos zajednici u kojoj posluje. Strateško opredjeljenje Banke je pomoć projektima od generalnog društvenog značaja, a naročito onim usmjerenim na djecu i osobe sa posebnim potrebama.

Prošle godine je i L'Oreal svoj volonterski dan pod nazivom "L'Oreal

Citizen Day" posvetio baš djeci oboljeloj od raka, Udruženju i Roditeljskoj kući. L'Orealov Citizen Day (Dan Građana) organizuje se u cijelom svijetu, uz odabir jedne nevladine organizacije i ranjive grupe društva kojoj se pomogne kroz praktične aktivnosti. L'Orealov izbor u Bosni i Hercegovini za 2018. godinu bili smo mi, naše Udruženje i Roditeljska kuća, a zaposlenici-volonteri L'Oreala odlučili su zelenu površinu oko kuće učiniti ljepšom.

Ofarbali su zid i klupe u krugu Roditeljske kuće, obnovili ljuljačke, posadili nove biljke, uredili zasadene površine ukrasnim kamenjem i malčom. Također, kupili su kosilicu, pokosili i uredili zelenu površinu oko Kuće.

Mladi Sindikata trgovine i uslužnih djelatnosti BiH (STBIH), u sklopu svog projekta za 2018. godinu su, također, radili na izgradnji i uljepšavanju dvorišta Roditeljske kuće za djecu oboljelu od raka. Pored doniranih 4000 KM za kupovinu materijala, mladi iz STBIH su učestvovali u uređenju površina kako bi naši mališani imali lijepo dvorište i prostor za boravak. Radili su na sadenju, kopanju, postavljanju žive ograde, farbanju, a uskoro očekujemo i ljuljačke.

Dvorište Roditeljske kuće sada sija, osvježeno je, lijepo i spremno za mališane, njihov izlazak, igru i odmor na zraku.

Volonterskim akcijama i uređenjem zelenih površina oko Roditeljske kuće koordinirao je Edin Šehić.



# Poklon koji život znači

Kako djeci oboljeloj od raka vrlo često, radi prirode liječenja kroz koje moraju proći, treba transfuzija, udruženje "Srce za djecu oboljelo od raka", Crveni križ FBiH, Crveni križ Općine Centar i Zavod za transfuzijsku medicinu FBiH pokrenuli su akciju dobrovoljnog darivanja krvi u Roditeljskoj kući koja je postala sinonim za drugi dom ovoj najhrabrijoj djeci.

Do sada su održane dvije akcije; u prvoj akciji 100 ljudi uspješno je darovalo svoju krv, dok se u drugoj akciji broj uspješnih darivanja povećao na 120. Ovaj broj dobrovoljnih davalaca krvi jasno pokazuje da među nama ne manjka humanih ljudi koji su spremni biti podrška ranjivim grupama.

Djeca oboljela od raka su jedna od ranjivih grupa kojima je krv svakodnevno potrebna, ona jesu istinski heroji, ali im je tokom liječenja potrebna pomoć. Potrebno je da i oni imaju svoje vlastite heroje koji će ih spasiti. Radi toga je i slogan ove akcije bio "Daruj krv, budi njihov heroj!"

"Kada kažemo da dajete poklon koji život znači, mi to bukvalno tako i mislimo, jer naša dječica svakodnevno trebaju krv i njene derivate da bi do kraja izdržali svoje liječenje. Bez darovane krvi, njihovo liječenje ne bi bilo moguće. Veoma smo zahvalni svim građanima koji su se odazvali akcijama i koji će sigurno pomoći pri izlječenju bar jednog djeteta. A ne treba ni govoriti šta i koliko to znači", rekao je direktor Udruženja Fikret Kubat.



Nesebičnu podršku realizaciji akcija darivanja krvi pružio je Namik Hodžić, generalni sekretar Crvenog križa FBiH.



## Raja podržava! I dalje...

The Brew Pub je i svoj četvrti rođendan poklonio i posvetio onima kojima je pažnja najpotrebnija. Umjesto da očekuju poklone, oni su učinili upravo suprotno i svojim rođendanom usrećili druge ljude oko sebe, drugu djecu. Kao i prošle godine sve se odigralo pod sloganom Raja podržava!

Naime, ova sjajna i plemenita priča rodila se iz ideje tima Brew Puba da pokuša ujediniti terapeutsko plivanje sa potrebama djece oboljele i liječene od raka. Stoga su, kroz svoju, više nego uspješnu, rođendansku kampanju, obezbijedili sredstva za plivačku opremu, prijevoz djece do bazena i terapeutsko plivanje sa trenerima Plivačkog kluba Spid u trajanju od 4

mjeseca, i za članove našeg Udruženja ali i za članove PK Spid.


Nevjerovatna energija koju nosi Brew Pub ekipa i ogromna snaga naše dječice i najvećih heroja Plivačkog kluba Spid su izrodili uspješnu priču o ljubavi, podršci, razumijevanju i veličini.

Ekipa iz Brew Puba naglašava da ništa od ovoga ne bi bilo moguće da nije bilo donatora velikog SRCA. Četiri glavna partnera ove nevjerovatne priče o zajedništvu su Sparkasse Bank BiH, OAZA, Sport Vision i Exit Festival koji su donirali novac.

Ogromno HVALA ide i ostalim kompanijama koje su prepoznale

vrijednost ove priče, podržali ju i doprinijeli ovakvom uspjehu: N1 Bosna i Hercegovina, Manuel Caffè BiH, KlixBa, Alfaenergy, Con2Cus, Symphony, Gazprom BiH, Addiko Bank BiH, Branded Sarajevo, LEGO Store Sarajevo, Propulsion i Cloud Ronin.

A da ova priča ima sve potrebne elemente za ovakav zaključak potrudili su se DTP Studio Aries, Bracom SportShop Sarajevo, Eurofer d.o.o. i Torte Twin Cakes. Hvala vam, divni ljudi!






## Zacrvenio se oktobar

Oktobar se ponovo zacrvenio i poprimio svu radost te boje. Naime, i u 2018. godini, kompanija Grateks d.o.o. i francuski brand Okaidi izabrali su Roditeljsku kuću za kampanju Crvenih nosića. Godinu ranije smo ju nazvali sedmica crvenih nosića, ali pošto je odziv građana bio više nego dobar i već nakon par dana tražen je nosić više, ovogodišnja kampanja trajala jedan mjesec.

Međutim, bh. građani su pokazali da im je i mjesec humanog šarenila malo. Širom BiH, u poslovnicama Grateksa u Sarajevu, Zenici, Mostaru, Banja Luci, u roku od samo nekoliko dana svi Crveni nosići su rasprodani. Cijena jednog bila je četiri konvertibilne marke, a kompletan iznos doniran je Roditeljskoj kući.

Tako je, na jako kreativan način, promovirana i širena svijest o djeci oboljeloj od raka. Kampanja crvenih noseva je, inače, popularna diljem svijeta. Pored toga što su svi nosići prodani, o uspjehu bh. kampanje govori i to što se tih oktobarskih dana na svim društvenim mrežama mogao vidjeti crveni nosić. Još jednom zahvaljujemo svim dobrim ljudima koji su nas podržali, uljepšavši kampanju svojim fotografijama sa crvenim nosićima.



## Znaju šta treba

Predstavništvo austrijske kompanije cargo-partner odlučilo je svoj jubilej, deset godina postojanja u BiH, obilježiti sa djecom oboljelim od raka pa su sredstva namijenjena za proslavu sa svojim partnerima preusmjerili na Program psihosocijalne pomoći i podrške djeci oboljeloj od malignih oboljenja i njihovim roditeljima.

Pored ove vrijedne donacije, zaposleni i menadžment cargo-partnera iskoristili su priliku i učestvovali u akciji Crveni nosić, te kupovinom simpatičnih nosića za sve zaposlene pružili podršku djeci oboljeloj od raka.

Udruženje "Srce za djecu oboljelu od raka" već 15 godina uspješno realizuje program psihosocijalne podrške. Sprovodimo ga na hematološkim odjeljenjima na dječijim klinikama u Sarajevu i Tuzli, te u Roditeljskoj kući, gdje su djeci i roditeljima na raspolaganju dva psihologa i socijalni radnik. Oni su tu, u svakom trenutku, kako bi im olakšaju cijeli proces suočavanja sa teškom dijagnozom, borbe, liječenja i za sve vrste savjetovanja kada su njihova prava u pitanju.

Iz Udruženja smo beskrajno zahvalni na ovoj donaciji i ukazanom povjerenju. Kompanija cargo-partner je pokazala svoju društvenu odgovornost i opredjeljenje da bude uz našu djecu kad im je to najpotrebnije, kao i da bude pokretačka snaga novih i boljih društvenih vrijednosti.





## Da, stalo mi je!

Humanitarna akcija "Mali znak da kažeš STALO MI JE!", uspješno je provedena kraju. U saradnji sa udruženjem "Srce za djecu oboljelu od raka" iz Sarajeva i Udruženjem roditelja djece oboljele od malignih bolesti "Iskra" iz Banja Luke, organizovala ju je kompanija Petrol BH Oil Company, na čijim su benzinskim pumpama u prodaji bili privjesci Zlatna vrpca. Udruženja iz FBiH i RS, te kompanija Petrol pokušali su i na taj način skrenuti pažnju na probleme s kojima se susreću djeca oboljela od raka i njihove porodice, a namjera je bila podići svijesti javnosti, kao i bolje razumijeti prepreke na koje djeca i njihove porodice nailaze tokom, ali i poslije liječenja.




Zlatna vrpca predstavlja simbol borbe djece oboljele od raka.



“ Rezultati akcije dokazuju da su naši kupci prepoznali naše zajedničke napore da pomognemo tamo gdje je pomoć najpotrebnija, da ovi hrabri mali borci dobiju svoju najtežu bitku. Zahvalio bih se svima koji su kupovinom privjeska dali svoj doprinos

rekao je Gregor Žnidrašič, direktor kompanije Petrol BH Oil Company.



VLADA FEDERACIJE BIH

## Premijer Novalić obećao da će nastaviti pomagati

Federalni premijer, Fadil Novalić, i ministrica okoliša i turizma FBiH, Edita Đapo, došli su u posjetu Roditeljskoj kući kako bi se upoznali s njenim dvogodišnjim radom i benefitima koje pruža oboljeloj djeci i njihovim roditeljima. Tokom obilaska, imali su priliku razgovarati sa roditeljima djece koja se trenutno liječe na Hematoonkološkom odjeljenju UKC-a Sarajevo i koji borave u Roditeljskoj kući.

Novalić i Đapo su pružili punu podršku roditeljima i djeci, a bili su oduševljeni interijerom i karakteristikama Kuće te komforom i uslovima u kojima borave djeca oboljela od raka. Od otvaranja Kuće, Vlada FBiH je Udruženju uplatila oko 170.000 KM kroz razne grantove, a premijer je najavio da ta podrška neće izostati ni u budućnosti.

Jer, rekao je Novalić, vrijednost Kuće je neprocjenjiva, a njen značaj ogroman i za djecu oboljelu od raka i njihove porodice i za cjelokupno bh. društvo. Obećao je da njegova podrška neće izostati i da je on, i dalje, veliki prijatelj Udruženja, a i djece oboljele od raka i njihovih porodica.

Zbog kontinuirane podrške u izgradnji i funkcionisanju Roditeljske kuće, Udruženje izražava svoju iskrenu zahvalnost Vladi Federacije BiH. Vladine institucije i nevladin sektor trebaju da grade partnerski odnos da bi se riješio i unaprijedio položaj naše djece.

POSJETE RODITELJSKOJ KUĆI

## Mjesto nade i optimizma

Nakon što su predstavnici udruženja "Srce za djecu oboljelu od raka",

polovinom aprila 2018. godine, bili u Gradskoj upravi Bihaća, bihaćki gradonačelnik, Šuhret Fazlić, i direktor Centra za socijalni rad Bihać, Senad Tutić, uzvratili su posjetu Sarajevu. Tokom boravka u našem glavnom gradu, susreli su se i razgovarali sa direktorom Udruženja Fikretom Kubatom, te se upoznali sa radom Udruženja i Roditeljske kuće.



U Roditeljskoj kući boravile su i porodice iz Unsko-sanskog kantona, odnosno Bihaća, a simbolična novčana donacija je, po Fazlićevim riječima, prvi korak ka budućoj konkretnijoj podršci Grada Bihaća Udruženju.

"Roditeljska kuća velika je humana misija koja uistinu pomaže porodicama čija su djeca nažalost oboljela od malignih bolesti i grad Bihać će, kroz rebalans budžeta, podržati rad Udruženja i boravak porodica kojima je Roditeljska kuća drugi dom i mjesto koje pruža optimizam i nadu u izlječenje njihovih najmilijih", kazao je Fazlić.



RODITELJSKA KUĆA JE JAVNO DOBRO

## Putevi prema sistemu

Roditeljska kuća javno je dobro, ima veliki utjecaj na bh. društvo i zato se udruženje "Srce za djecu oboljelu od raka" sve vrijeme zalaže da se i vlast uključujući u sistemsko rješavanje njenog statusa. Djeca iz cijele Federacije BiH

# vijesti

borave u Roditeljskoj kući i koriste sve njene benefite, pa smo vrlo često govorili o tome kako je bitno da se svi nivoi vlasti uključe u rješavanje te problematike.

Tokom 2018. smo dobili podršku nekih kantona i opština van Katona Sarajevo, koje su stale uz svoje sugrađane i osjetile se dužnima da pomognu u borbi onima kojima je ta podrška zaista potrebna. Kantoni koji su podržali rad Roditeljske kuće i podršku pružili na više načina su: Sarajevski, Zeničko-dobojski i Unsko-sanski. Veoma smo zahvalni vladama ovih kantona što su shvatili važnost borbe svojih sugrađana, što su iskazali potrebu da budu uz njih, te što su, na koncu, podržali Roditeljsku kuću, njihov drugi dom i utočište u nevolji.

Gradske uprave Sarajeva i Bihaća su pokazale da su spremne biti dio podrške i mogućeg sistemskog rješenja finansiranja Roditeljske kuće, te su i dale svoju podršku. Općine Stari Grad - Sarajevo, Novo Sarajevo, Centar - Sarajevo, Tešanj i Kakanj također su željele stati uz svoje sugrađane i bar na neki način pokazati svoju podršku.



OBEĆANJA STIŽU

## Međunarodna podrška

Učesnici Sarajevo Business Foruma, njena ekscelencija Sheikhha Mariam Bint Hamad Al Khalifa, te delegacije Kraljevine Bahrein i Indije, posjetili su Roditeljsku kuću i udruženje "Srce za djecu oboljelu od raka", poblizhe se upoznali sa radom i funkcionisanjem, te obećali podršku djeci oboljeloj od raka i aktivnostima Udruženja. Posjetu je organizirala BBI banka, a nama je bilo veliko zadovoljstvo ugostiti ih i pokazati našu Kuću.



BILO JE VESELO

## Kad naftaši crtaju

Članovi volonterskog kluba HoldINE i Energopetrola posjetili su Roditeljsku kuću u Sarajevu, družili se sa mališanima i uručili donaciju namijenjenu radu Udruženja. Tokom posjete, volonteri su učestvovali na radionici crtanja i, zajedno sa animatorima kroz igru i pravljenje balona, razveselili mališane. Volonterski klub je projekat kompanija HoldINA i Energopetrol u sklopu kojeg se pruža prilika zaposlenicima da aktivno sudjeluju u akcijama i aktivnostima koje doprinose društvenoj zajednici u kojoj kompanija djeluje.

KCUS-a olakšali liječenje i oporavak. Direktor Udruženja Srce za djecu oboljelu od raka, Fikret Kubat, iskreno je zahvalio na podršci i Tanoviću, predsjedniku Izvršnog odbora vakufa, uručio plaketu-zahvalnicu.

Čurčića vakuf je uspostavio Salih-aga Čurčić 1736. u Sarajevu, a osnivačku imovinu su činili novac i porodična kuća-konak, te karavan saraj (han) u imaretskoj čaršiji u Sarajevu. Prihodi od izdavanja su bili namijenjeni izdržavanju potomaka, održavanju i opravci četiri džamije u Sarajevu, Karauli i Livnu te održavanju imovine vakufa. Danas se agini potomci, okupljeni oko Udruženja Čurčića vakuf, bave humanitarnim radom i osim obaveza iz Vakufname, podržavaju obrazovne projekte, stipendiraju djecu i omladinu, te pomažu izdavačke, kulturne i dobrotvorne djelatnosti.



FK SARAJEVO

## Tim koji se hrabro bori

Udruženje "Srce za djecu oboljelu od raka" i Roditeljska kuća svojim radom i trudom stječu sve više prijatelja, a djeca oboljela od raka i njihove porodice dobijaju sve više podrške koja im je neophodna da bi što lakše podnijeli ovaj teški period u svojim životima.

Novo pojačanje u našoj ekipi prijatelja je i FK Sarajevo čiji su predstavnici posjetom Roditeljskoj kući pokazali djeci i roditeljima da su tu, da žele biti njihov oslonac, da igraju za isti tim, za tim koji se hrabro bori protiv raka. Za tim koji je spreman na pobjedu.

U Roditeljskoj kući, direktorica FK Sarajevo, Sabrina Buljubašić, i šef stručnog štaba, Husref Musemić, proveli su divno popodne druženje sa djecom, nasmijavajući ih, te u razgovoru s roditeljima, naglasili da su došli s namjerom da učvrste zajedničko prijateljstvo i da u njima imaju oslonac i prijatelja za cijeli život.

ČURČIĆA VAKUF UZ NAS

## Nije sve u Vakufnami

Jusuf Tanović, Emir Arslanagić i Šamira Ramusović, predstavnici Čurčića vakufa, tokom posjete Roditeljskoj kući i udruženju "Srce za djecu oboljelu od raka", uručili su vrijednu donaciju - dvoja invalidska kolica, toaletna kolica i dva para podlaktnih štaka - da bi djeci koja se liječe na Hematoonkološkom odjelu Pedijatrijske klinike Jezero i Ortopediji



AUTO CENTAR ITALY

## Poklonili, pa opet poklonili

Na svečanosti povodom otvaranja svog novog salona, direktor A.C.I., Auto Centra Italy, Mirsad Hamzić, uručio je direktoru udruženja "Srce za djecu oboljelu od raka", Fikretu Kubatu, ček u iznosu od 5.000 KM, kako bi pomogao rad Roditeljske kuće. Nekoliko dana nakon svečanosti, predstavnici A.C.I. posjetili su i djecu i roditelje u Roditeljskoj kući, donijeli im zdrave namirnice i mnoge lijepe poklone, na kojima smo im svi od srca zahvalni.



VIŠE OD DONACIJE

## Važna je zdrava hrana

Kompanija Beko donirala je, za Roditeljsku kuću na Jezeru u Sarajevu, kuhinjske aparate i uređaje pomoću kojih se lakše i brže priprema zdrava hrana, posebno bitna za djecu koja se liječe od raka.

Uručujući simbolični ček direktoru udruženja "Srce za djecu oboljelu od raka", Fikretu Kubatu, Burak Kiroglu, iz kompanije Beko za Balkan, rekao je da je na odraslima odgovornost da uspostavljanjem zdravih prehrambenih navika stvore čvrstu osnovu da se djeca zdravo hrane.

Kubat je naglasio važnost zdrave ishrane posebno za djecu tokom i nakon liječenja, te rekao da treba razvijati svijest kod sve djece i njihovih roditelja o potrebi njegovanja zdravih prehrambenih navika i životnih stilova.



NIJE SVE SAMO U DONACIJAMA

## Osmjeh zaista za svaki dan

Roditeljska kuća bila je mjesto svečana primopredaja donatorskog čeka od 79.000 KM prikupljenih humanitarnom akcijom "Osmjeh svaki dan". Akciju je organizovala AmCham, Američka trgovačka komora u BiH, u suradnji sa udruženjem "Srce za djecu oboljelu od raka". Roditeljska kuća egzistira jedino zahvaljujući filantropskom senzibilitetu pojedinaca i dijela društvenih struktura, a rezultati ove akcije dokaz su da poslovna zajednica u BiH nije ostala ravnodušna na poziv AmChama da se pomogne djeci sa malignim oboljenjima.

Na ceremoniji u Roditeljskoj kući, AmCham BiH i Udruženje zahvalili su se još jednom volonterima i donatorima. Zlatni donatori su Marić&Co, Symphony, Fondacija Junuzović, Hifa petrol, Srebrni donator BH Telecom, a Bronzani donatori Atlantbh, Mikrokreditna fondacija Partner i start-up Ministry of Programming. Donatori su imali priliku da obiđu Roditeljsku kuću i pobliže se upoznaju sa njenim radom, korisnicima i potrebama.

Cilj akcije "Osmjeh svaki dan" nije bio samo prikupiti donacije i tako pomoći radu Kuće, već i podići svijest o volonterizmu. AmCham BiH je tokom akcije uspio animirati više od 30 volontera iz poslovne zajednice u BiH koji su se dobrovoljno prijavili kako bi kontinuirano učestvovali u njenom radu u skladu sa njihovim afinitetima i mogućnostima.



DŽEMAT NUR IZ SAINT LUISA

## Opravdaćemo povjerenje

Da nas Bosanci i Hercegovci širom svijeta nisu zaboravili, dokazuje i džemat Nur iz Saint Luisa u SAD, čije su se džematlije uključile u akciju podrške oboljeloj djeci i Roditeljskoj kući, te sakupile 7.000 američkih dolara. Mi smo se obavezali da ćemo ovaj novac trošiti savjesno i transparentno, te da ćemo djeci oboljeloj od raka pružiti što bolju podršku tokom i nakon liječenja. Sve svoje snage ćemo uložiti u to da opravdamo donaciju koju smo dobili. Zahvaljujemo našim prijateljima iz Saint Luisa na ukazanom povjerenju.



PLAYSCHOOL MIJENJA SVIJET

## Nabolje!

Udruženje za kreativno i zabavno učenje PlaySchool i njihovi redovni članovi su nacrtali crteže, prodali ih, te tako zaradenim novcem kupili 39 predivnih knjiga i poklonili ih mini biblioteci Roditeljske kuće. Iz PlaySchoola su poručili: "Mi učimo djecu da mijenjaju svijet. Nabolje!"



FIN-OV PREDMET VAN FAKULTETA

## Više od jedne kuće

Studenti treće godine Fakulteta islamskih nauka, sa profesorom Mustafom Hasanijem, u okviru izbornog predmeta koje slušaju van fakulteta, već drugu godinu za redom imali su predavanje u Roditeljskoj kući. Profesori FIN-a ponovo su izabrali Roditeljsku kuću, jer su prepoznali njen značaj i žele pokazati studentima da je to više od jedne kuće koja pruža smještaj, te da je tu uloženo puno rada, truda, volje i želje da ona postane to što danas jeste - svijetla tačka djeci koja se liječe i njihovim roditeljima.

MladiCe Nejra Musić i Advija Džambas predstavile su udruženje "Srce za djecu oboljelu od raka", našu misiju i viziju, šta mi to radimo, približile su im rad Roditeljske kuće, njen značaj i opravdanost postojanja, ali i svoj angažman u MladiCama, koliko im to znači, koliko ih ispunjava i koliko to pomaže onima koji trenutno prolaze kroz ono što su i same preživjele. Ispričale su im svoje priče i iskustva sa malignom bolesti, kako su se nosile s bolešću i borbom, šta im je bilo najteže, ali i šta im je najviše pomagalo. Takve priče uvijek probude emocije, pa su se na licima prisutnih mogle vidjeti i suze, a profesor i studenti su imali puno pitanja za Nejr i Adviju.





RAZNOVRNA ISHRANA

## Enko nas obradovao

Svi smo čuli kako pozitivno na zdravlje utječu raznovrsne namirnice, a jedna od nutritivno vrijednih namirnica je i jaje prepelice. Da bi naši mališani lakše prebrodili svoj period liječenja, naš veliki prijatelj Enko je za njih u Roditeljskoj kući obezbijedio i donirao svježa jaja od prepelica. Zahvaljujemo se Enku na neumornom trudu i zalaganju da našim malim borcima obezbijedi zdravu ishranu.



DOMAĆE, ORGANSKO

## Svako jutro jedno jaje...

Davno je dokazano da svako jutro jedno jaje organizmu snagu daje. Za sve ukusne doručke i ostale pripravljene obroke zahvaljujemo Ermini koja je donirala kvalitetna domaća organska jaja. Ona je, također, mjesec dana od svake prodane školjke jaja odvajala dio sredstava i donirala ih Roditeljskoj kući.



DIJASPORA NE ZABORAVLJA

## Ljiljani iz Växjöa

Već drugu godinu predstavnici bh. udruženja Ljiljan iz Växjöa u Švedskoj posjećuju Roditeljsku kuću i doniraju sredstva za njen rad. Veliko hvala dobrim ljudima iz Ljiljana što misle na našu djecu i što podržavaju rad njihovog drugog doma. Hvala dijaspori iz Švedske koja su uz našu djecu.



RICHMOD PARK SCHOOL

## Žele nastaviti


Nakon što su uspješno organizovali bazar hrane, na kojem su prikupili određena sredstva za pomoć našoj djeci, članovi Vijeća učenika škole Richmod Park School posjetili su Roditeljsku kuću, upoznali se s načinom rada, te zaključili da bi željeli i u budućnosti sarađivati sa Roditeljskom kućom.



AKCIJA U KONJICI

## Stigla nam je zdrava hrana

Mnogo zdravih proizvoda došlo nam je iz Konjica. Sve to zahvaljujući našoj velikoj prijateljici Amri Mušinović Husić i donatorima: Savezu poljoprivrednih udruženja Općine Konjic, Udruženju pčelara Roj, Udruženju građana za proizvodnju mlijeka i mesa Farmer, Udruženju Žena za ženu i JU Obdanište Zulejha Begeta. Posebno nas je iznenadila Amrina kćerka koja je poklonila svoje crtane filmove za našu dječicu. Još jednom veliko hvala Amri i svim donatorima koji su dali svoj doprinos ovoj akciji. Našoj djeci i njihovim roditeljima mnogo znači ova vrsta proizvoda.



KAMPANJA IZ MAGLAJA

## Niko kao žena!

Kroz kampanju "Žena je ženi podrška", koju su pokrenule žene iz Maglaja, izrađeno je mnogo predivnih proizvoda, koji su stigli i do Roditeljske kuće. Naime, žene Maglaja su našim mališanima izradile predivne pamučne kapice sa dječijim motivima. Kape su uvijek dobar poklon za djecu oboljelu od raka, jer ih vrlo često koriste.



DJECA ZNAJU

## Usrećiti najmlađe

Tokom obilježavanja Dječije nedjelje, djeca iz JU Dječije obdanište i dom učenika Bosanska Krupa i grupe Bubamare, Pačići, Leptirići, Ribice i Pčelice sa svojim odgajateljicama i roditeljima, u akciji "Djeca djeci" prikupili su poklone za djecu iz našeg Udruženja.

"Ovom malom gestom želimo podržati vaše Udruženje i vaš rad, te kroz akciju darivanja želimo usrećiti najmlađe korisnike Udruženja", kažu u Bosanskoj Krupi.

Akciji su se pridružili i zaposleni Brze pošte In Time Sarajevo, koji su besplatno dostavili pakete sa poklonima za našu dječicu.



NAŠI VOLONTERI

## Važna je želja

Trudimo se da u rad udruženja "Srce za djecu oboljelu od raka" više uključujemo volontere, pa smo njihov potencijal uključili i u radionicu za izradu zlatnih vrpca povodom Zlatnog septembra - mjeseca podizanja svijesti o dječijem raku. Bilo je to, prije svega, divno druženje, ispunjeno smijehom i radošću. Ljudi spojeni humanošću i jakom željom da pomognu onima kojima pomoć treba, za tili čas uspjeli su izraditi više od 500 komada zlatnih

vrpca koje su simbol borbe protiv dječijeg raka i koje su pomogle podizanju svijesti kroz razne kampanje koje su uslijedile.



HALLOWEEN KAO POVOD

## Mandarine umjesto bundeve

Djecu koja i inače uživaju u igri prerusavanja, 2018. smo odlučili razveseliti i za Halloween. Bio im je to odličan povod da na jedan dan postanu princeza, grof Drakula ili neki drugi lik koji im je interesantan svojom pojavom. Zaista je bilo veselo u Roditeljskoj kući na toj mini Halloween zabavi, puno smijeha i razdraganosti. Nakon zabave, MladiCe i volonteri Udruženja su u svojim kostimima posjetili i mališane koji su boravili na Hematoonkološkom odjeljenju Pedijatrijske klinike, ali su im umjesto narandžastih bundevi, ponijeli mandarine. Djeca su se oduševila kada su na odjeljenje ušle Snjeguljica, Crvenkapa i princeza. Bilo je to druženje za pamćenje.



KAD VEDO ZAPJEVA

## Slušati želje

Želje naših mališana su nam često i zadatak. Oslušujemo ih kada govore, slušamo njihove snove i nadanja, pa se trudimo da ispunimo

ono što je u našoj moći. Jednu želju je imao i dječak Vedad Hadžić iz Zenice. Slušali smo ga kako u Roditeljskoj kući pjeva hitove svog omiljenog pjevača i zajedno sa prijateljima sa Hayat TV-a, smo mu uspjeli ispuniti želju. U posjetu mu je došao njegov omiljeni pjevač, Semir Cerić Koke, a Vedo je uživao u svakom trenutku. Pjevao je i smijao se zajedno sa Koketom i još dugo nakon toga spominjao ovo neočekivano upoznavanje.




TRANSPARENTNOST PRIJE SVEGA

## Plastron obilježio uspješnu poslovnu godinu

Računovodstveni servis „Plastron“ koji se brine za sve računovodstvene potrebe Udruženja je, i na kraju 2018. godine, održao svečani ručak i na taj način obilježio kraj još jedne uspješne godine. Ovo je bio i povod da Udruženju uruče donaciju u vrijednosti njihovih usluga prema Udruženju. Zaista smo dirnuti ovim gestom i zahvaljujemo se direktoru Plastrona i svim uposlenim što su, na neki način, volonterskim radom doprinijeli boljem i transparentnijem djelovanju udruženja „Srce za djecu“.

Mi se svakodnevno trudimo da uskladimo naše poslovanje sa zakonom i da budemo maksimalno transparentni kako prema našim donatorima, tako i prema bh. javnosti te stoga redovno radimo i reviziju u Deloitte d.o.o. Naša obaveza je da vaše donacije trošimo namjenski, transparentno i odgovorno.



# Prijatelja nikad nije previše



U kakvoj god se životnoj situaciji našli, praznici i ono što oni nose sa sobom - nostalgija, radost, ljubav i toplinu - su uvijek razlog toplije i prisnije atmosfere u Roditeljskoj kući i među ukućanima. Djeca se razvesele, iščekuju, raduju se. Roditelji iskoriste priliku da stvore dobru prazničnu atmosferu i Roditeljska kuća zasija posebnim sjajem, ispuni se posebnim emocijama, ljubav je u fokusu, kao i dobro raspoloženje.

## Damir je bio iznenađenje

Prošle godine smo, tokom mjeseca Ramazana, organizovali nekoliko iftara sa nekim od naših donatora, sa prijateljima i medicinskim osobljem, i hrabrim roditeljima i dječicom koji su se posebno radovali ovim večerima.

Malak Regency Hotel je dao posebnu podršku i cijeli Ramazan, svaku večer, donirao iftar za djecu i roditelje koji borave u Roditeljskoj kući. Kao dobri domaćini, pozvali naše prijatelje iz Malak Regency Hotela na zajednički iftar u Roditeljsku kuću i proveli zaista predivno vrijeme u druženju. A Malak se potrudio da pripremi dodatno iznenađenje za našu djecu i roditelje, pa su sa sobom povel i svog prijatelja Damira Džumhura, našeg najboljeg tenisera. Naravno da je iznenađenje uspjele!

## MladiCe su pravi primjer

Na jednom od iftara bili su i naši veliki prijatelji sa Hayat TV. S njima smo proveli zaista prelijepo vrijeme družeći se u pravoj porodičnoj atmosferi. Naše vrijedne majke su se potrudile da naprave razne specijalitete i oduševile naše goste sa Hayata.

Praznici ne bi bili tako lijepi da ih nismo proveli sa ljudima koje svi mi smatramo svojom porodicom, sa medicinskim osobljem sa Hematoonkološkog odjeljenja Pedijatrijske klinike Jezero. Oni se svakodnevno brinu za naše mališane i pomažu im da dostignu svoje ciljeve i izliječe se. Iftar je najmanje što možemo podijeliti s njima, kako bismo im pokazali svoju zahvalnost.

I naše MladiCe su iskoristile praznični duh i organizovale iftar sa roditeljima i djecom. Oni su uvijek rado viđeni u Roditeljskoj kući, ali kada je veliki broj njih na jednom mjestu u jednom trenutku, onda je to još veći poticaj roditeljima da vjeruju da je rak izlječiv, jer imaju pravi primjer pred sobom.

“  
Praznici ne bi bili tako lijepi da ih nismo proveli sa ljudima koje svi mi smatramo svojom porodicom



# Najvažnija je pažnja

Divne geste uvijek nas podsjetite da dobrota u ljudima nije prolazna i da naša djeca i roditelji imaju na koga da se oslone



Nova godina i božićni praznici su vrijeme kada želimo da poklonimo pažnju drugima, da im izmamimo osmijeh na lice. Mnogi dobri ljudi svake godine se sjetu djece oboljele od raka pa donesu poklone i paketiće kako bi ih razveselili i uljepšali im praznike koje provode daleko od svoje kuće.

\*\*\*



Uniqa osiguranje je u Roditeljsku kuću je donijela mnogo osmijeha sa klovnom, a onda su djecu oduševili Djedom Mrazom koji je, za djecu, donio pregršt veselih paketića.

\*\*\*



Pripadnici Specijalne jedinice MUP-a Kantona Sarajevo ove su nam praznike učinili nešto drugačijima: pojavili su se u svojim super uniformama, a djeci pokazali i svoja specijalna vozila i priuštili im jednu nezaboravnu vožnju. Dječaci su posebno bili oduševljeni kada su ih vidjeli, jer mnogi od njih sanjaju da jednog dana postanu policajci ili dio neke specijalne jedinice. Naravno da naši prijatelji specijalci, u cijelom tom super zanimljivom performansu, nisu zaboravili i paketiće kojima se djeca uvijek i iznova obraduju.



Ni ove godine nas naši veliki prijatelji iz Sudske policije FBiH nisu zaboravili. Naša dječica su već navikla da su u ovo praznično doba i ovi super policajci uz njih, a mnogo su se obradovala njihovim poklonima.

\*\*\*



Da su prijatelji i podrška djeci oboljeloj od raka mnogo puta su do sada pokazali iz FK Sarajevo. Ni ovi praznici nisu prošli bez njihove podrške. Predivne personalizovane poklone donijeli su za našu djecu, a podijelio ih je bordo Djed Mraz.

\*\*\*



Božić je vrijeme kada nas posjete i marinci američke vojske. Druženje s njima uvijek izaziva uzbuđenje kod naše dječice i uvijek su puni pitanja za njih o njima i njihovom radu.

\*\*\*





Već drugi Božić za redom, podrška nam stiže i od naših prijatelja iz Protestantske crkve. Oni su pokazali kako brinu za sve grupe kojima podrška treba, a svojim primjerom pozivaju članove svih vjerskih zajednica da čine dobro za sve one kojima je pomoć potrebna. Svojim divnim poklonima uvijek razvesele našu djecu.

\*\*\*



Dječiji vrtić Sveta Obitelj Caritasa Vrhbosanske nadbiskupije odlučio je biti podrška djeci oboljeloj od raka i svima koji borave u Roditeljskoj kući. Mališani iz predškolskih skupina Kolibrići i Cvjetići donijeli su poklone ispred roditelja i odgajatelja vrtića i svojim pričama razveselili sve nas.

\*\*\*



FK Željezničar je sa sobom donio neobičnog plavog Djeda Mraza koji je uspio razveseliti i uljepšati snježni dan. Veselje je bilo veliko, a paketići su izmamili velike osmijehe na dječija lica.

\*\*\*



Firma Ečo Company, kao društveno odgovorna kompanija, poklonila je novogodišnje paketiće i novac djeci u Roditeljskoj kući. Generalni direktor, Suad Ečo, čestitao je direktoru Fikretu Kubatu i osoblju Udruženja na svakodnevnoj podršci i brizi koju pružaju ovoj djeci i time im poboljšavaju uslove liječenja i život nakon liječenja.

\*\*\*



Potaknuti i ovogodišnjim prazničnim duhom, studenti Muzičke akademije Univerziteta u Sarajevu (MAS) posvetili su dva dana djeci koja nisu u mogućnosti biti stalna publika na koncertima klasične muzike, a muzika im predstavlja veliku radost. Zato su obišli našu Roditeljsku kuću i JU Zavod za specijalno obrazovanje i odgoj djece «Mjedenica». Koncertima i nizom muzičkih aktivnosti,

te nezaboravnim druženjem uljepšali su ove praznične dane djeci, a dodatne osmijehe izmamili paketićima koje je obezbijedio Sindikat Muzičke akademije. Da je muzika terapija, pogotovo za djecu, da na mališane djeluje smirujuće i poticajno, pokazuje i naša saradnja sa Muzičkom akademijom Univerziteta u Sarajevu.

\*\*\*



Adnan Hodžić, iz Doboja Istok, pokazao je da brine i da želi biti uz djecu oboljelu od raka. On je u svom gradu pokrenuo akciju i prikupio sredstva za 100 paketića, sam kupio namirnice i sve ih sam zapakovao. Od preostalog novca je kupio voće i potrepštine za Roditeljsku kuću. Ovakav divan gest nas podsjeća da dobrota u ljudima nije prolazna i da naša djeca i roditelji imaju na koga da se oslone.

\*\*\*

## CEMEX za naš dom

Dugogodišnja borba udruženja "Srce za djecu oboljelu od raka" i priča koju priča Roditeljska kuća, dobili su svoj epilog 2018. jednom predivnom nagradom. U konkurenciji među oko sedamdeset građevinskih projekata iz cijelog svijeta, Roditeljska kuća dobila je međunarodnu Graditeljsku nagradu CEMEX, koja je i ove godine dodijeljena u Mexico Cityju u Meksiku.

Ova nagrada se već skoro trideset godina dodjeljuje najuspješnijim projektima stambene, javne i infrastrukturne gradnje. Roditeljska kuća bila je nominovana u dvije kategorije: Socijalna vrijednost i Javne i poslovne građevine, u kojoj je osvojila drugo mjesto.

Za predstavnika Bosne i Hercegovine Roditeljsku kuću odabrao je Odbor nacionalne Graditeljske nagrade, čiji su članovi doc. dr. Gordana Broćeta, prodekan za naučno istraživački rad Arhitektonsko-građevinsko geodetskog fakulteta Univerziteta u Banjoj Luci, dr. sc. Ivo Čolak, redovni profesor Građevinskog fakulteta Sveučilišta u Mostaru, te poznati arhitekta Hasan Čemalović.

Arhitektonsko rješenje Roditeljske kuće je djelo Emira Salkića iz studija Normal arhitektura iz Sarajeva. Projekat konstrukcije izvela je kompanija Euroengineer, takođe iz Sarajeva, a izvođač radova je kompanija Džena iz Gradačca. Nagradu u Meksiku je preuzeo arhitekta Emir Salkić.

### Roditeljska kuća dobila međunarodnu Graditeljsku nagradu CEMEX, koja je i ove godine dodijeljena u Meksiku

Svojim međunarodnim izdanjem Graditeljske nagrade CEMEX podstiče i nagraduje talente u arhitekturi i graditeljstvu, razvija globalnu kulturu inovacija i kreativnosti te podstiče gradnju visoke održivosti upotrebom novih betonskih tehnologija.

Nagrada CEMEX uspostavljena je sa svrhom prepoznavanja najkvalitetnijih radova na području graditeljstva Meksika, matične zemlje tvrtke CEMEX, a od 2005. godine konkurs je međunarodnog karaktera.

Dodjeljuje se najuspješnijim svjetskim projektima stambene, javne i infrastrukturne gradnje, a posebne nagrade dodjeljuju se i projektima koji poštuju načela održive gradnje, dostupnosti objekata osobama s posebnim potrebama, ostvaruju posebnu društvenu vrijednost ili pokazuju inovativnost gradnje. Danas ona predstavlja jasan odraz i opredjeljenje CEMEX-a da aktivno učestvuje u međunarodnoj graditeljskoj kulturi.



### IZBOR MUŠKARCA GODINE U BIH

## Fikret Kubat humanista 2018.

U organizaciji Media PR agencije i SNL magazina, u sarajevskom hotelu Austria&Bosna, biran je muškarac godine, i to u kategorijama Glumac godine 2018., Izvođač godine 2018., Sportista godine 2018., Humanista godine 2018., Genij godine 2018., Modni brend godine 2018., Ličnost godine 2018., Novinar godine 2018., Menadžer godine 2018., Dizajner godine 2018., Priznanje za životno djelo i Muškarac godine BiH 2018.

U kategoriji humanista godine 2018., kao najveći humanista u muškoj populaciji, izabran je direktor udruženja "Srce za djecu oboljelu od raka", Fikret Kubat. Vijest je došla nenadano i iznenadila je cijeli tim Udruženja. Dugogodišnji mukotrpan rad, svakodnevna borba za djecu oboljelu od raka i njihove porodice, te zalaganje i trud krunisani su jednom ovakvom divnom nagradom.

"Moja najveća nagrada su osmijesi djece i roditelja kada im pružimo potrebnu podršku i pomoć. Najveća nagrada mi je bar jedno izliječeno dijete. Naravno, sve je to slađe kada dobijete i priznanje od društva, te na taj način znate da imate podršku sa svih strana", rekao je Kubat.





## Zadovoljni i ljekari

Saradnja udruženja "Srce za djecu oboljelu od raka" sa Univerzitetskim kliničkim centrom Tuzla i Klinikom za dječije bolesti, te Odjeljenjem za hematologiju i onkologiju, pokazala se kao pun pogodak. Otkako je počelo liječenje djece od malignih bolesti na UKC Tuzla, suočili smo se sa istim potrebama podrške djeci i roditeljima koji se tu liječe. Potpisivanjem sporazuma o saradnji sa UKC-om i početkom sprovođenja našeg programa psihosocijalne podrške, uspjeli smo olakšati intenzivno bolničko liječenje našim mališanima i njihovim roditeljima.

Pored našeg psihologa koji svakodnevno radi sa djecom, roditeljima i osobljem na Odjeljenju za hematologiju i onkologiju, kao odlično rješenje pokazao se i Roditeljski stan, otvoren za potrebe roditelja djece oboljele od raka koji se liječe na Odjeljenju. Stan je obezbijedilo Udruženje, zajedno sa UKC Tuzla, za potrebe smještaja i boravka onih koji dolaze na liječenje iz udaljenih krajeva Tuzlanskog kantona.

Roditelji, ali i djeca, tokom pauze u liječenju mogu potpuno besplatno boraviti u stanu, u kojem imaju osigurane sve osnovne uslove za život.

"To će u znatnoj mjeri olakšati boravak prije svega roditelja i djece u našoj Klinici, a prevashodno se odnosi na djecu koja su oboljela od malignih bolesti, čije je liječenje dugotrajno, znači po nekoliko mjeseci, izjavio je načelnik Klinike za dječije bolesti UKC-a Tuzla, Edin Husarić.

## Brinuti srcem

Udruženje "Srce za djecu oboljelu od raka" prošle je godine, zajedno sa sa Medical Park grupacijom bolnica iz Turske i uz veliku podršku UKC-a Tuzla, uspjelo realizovati projekat rekonstrukcije i adaptacije Ambulante za hematologiju i onkologiju Klinike za dječije bolesti UKC-a Tuzla. Cilj je bio ispuniti sve vrhunške standarde u rekonstrukciji i opremanju jednog ovakvog bitnog prostora za djecu oboljelu od raka, jer je od presudne važnosti da sve komponente budu vrhunskog kvaliteta, ali i vizuelno u potpunosti prilagođene dječijem uzrastu.



"Drago nam je što smo imali priliku pomoći na ovom projektu i velika nam je čast bila biti dio njega, zajedno sa Udruženjem i Kliničkim centrom Tuzla. Mi srcem brinemo za ove najveće heroje i oni nas uče kako da budemo humani, zadovoljni i istinski zahvalni na svemu. Nadamo se da će im ovaj prostor bar malo olakšati težak proces kroz koji prolaze, a da će i medicinskom osoblju olakšati rad", izjavio je direktor Internacionalnog odjela Medical Parka, Murat Ercan.



## Zajedno sve možemo

Tokom prošle godine, udruženje "Srce za djecu oboljelu od raka" je, zahvaljujući mnogim humanim građanima BiH, institucijama, kompanijama koje podržavaju rad Udruženja, te velikoj podršci bh. građana iz dijaspore, uspjelo obezbijediti dvije velike donacije Odjeljenju za hematologiju i onkologiju Klinike za dječije bolesti UKC Tuzla.

Jedna je monitor za praćenje vitalnih funkcija u vrijednosti od 10.000 KM, a druga dozatori kisika, prenosni aspirator i infuzomati u vrijednosti od 11.603 KM. Zahvaljujući odličnoj saradnji sa menadžmentom UKC Tuzla, te sa menadžmentom Dječije klinike i Odjeljenja za hematologiju i onkologiju, mi imamo priliku poboljšati uslove liječenja naše djece koja to zaista i zaslužuju.



## Poželiš životinju i klovnovi je naprave

Među mnogo prijatelja, koje već imamo u Tuzlanskom kantonu, su i predivni ljudi iz neprofitne organizacije Tuzlanska Amica, s kojima smo zajedno organizovali posjetu Dječijoj klinici UKC Tuzla. A poveli smo grupu ljudi iz Forlija iz Italije koji se, pod nazivom "Vivamo in positivo - Živimo pozitivno", bave klovnovskom terapijom.

Cilj je, prvenstveno, bio unijeti radost i veselje u Dječiju kliniku, izmamiti osmijeha i boravak u bolnici, bar na jedan dan, promijeniti i učiniti zabavnijim. Klovnovi su se posebno potrudili, na Odjeljenju za hematologiju i onkologiju, izmamiti što više osmijeha na lica najvećih heroja, djece koja su oboljela od raka i koji prolaze teško i zahtjevno bolničko liječenje, ali uzbuđenja, radoznalosti i sreće bilo je na svim odjeljenjima.

Mnogo oduševljenja je izazvala mala predstava koju su izveli naši prijatelji iz Italije, kako to samo klovnovi mogu i umiju. Još veće oduševljenje su izazvele životinje pravljenе od balona na licu mjesta. Djeca su zahtijevala i željela, a svi su se zajedno potrudili da sve želje bude ispunjene.



# Govorimo javno, jasno i glasno

Ove dvije MladiCe su fantastični mladi ljudi koje su izborili najveću bitku u svom životu. Puni su energije, a brojnim aktivnostima javnosti žele ukazati na pitanja o kojima društvo, uglavnom, šuti



**BILTEN:** MladiCe od osnivanja kontinuirano rade na mnogim projektima. Šta smatrate vašim najvećim uspjehom u 2018. godini? Da li je to možda prva nagrada za dokumentarni film "Velika bijela kuća", na 7. Dubrovnik Film Festivalu (DUFF)?

ADVIJA: Zaista smo ponosni na ono što radimo i način na koji doprinosimo, kako vlastitim projektima, tako i projektima Udruženja. U ovoj godini smo uradili sve što je bilo predviđeno godišnjim planom, a naš najveći uspjeh jeste upravo dokumentarni film "Velika bijela kuća" i prva nagrada DUFF-a.

MUHAMED: MladiCe su grupa unutar Udruženja Srce za decu oboljelu od raka, koja je osnovana 2010. Prvobitni cilj osnivanja MladiCa jeste da nastave svoje druženje sa prijateljima, sa kojim su se liječili, kao i da radimo na raznim projektima. Također, želimo biti podrška onima koji se liječe, uz podršku Udruženja kojie to pokušava riješiti. Broj MladiCa iz godine u godinu se povećava i sada nas ima oko 50, a aktivnih članova ima oko 30, koji vrijedno rade i pružaju svoj maksimum kako bi pomogli udruženju. Kroz naš dugogodišnji rad na raznim projektima, došao je jedan od najvećih projekata za nas MladiCe, a to je snimanje filma "Velika bijela kuća". Na projektu smo radili u saradnji sa Zoranom Čatićem. Film "Velika bijela kuća" smo radili u 2018., kada smo ga plasirali i na Dubrovnik

Film Festivalu ( DUFF), gdje smo dobili i glavnu nagradu. Takmičenje je organizovano sedmi put i nikada do tada se nije desilo da se oko izbora filma složi i publika i žiri. Budući smo mi to radili iz duše, vidjelo se da svi učesnici jednoglasno žele da mi osvojimo nagradu. Od početka sam bio siguran u sebe, kao i u naš rad, i da ćemo napraviti nešto zbog čega će svi biti ponosni na nas.

**BILTEN:** Široj javnosti je malo poznato šta sve prolaze mladi oboljeli od raka u BiH. Koliko je vaš film približio ono kroz ste vas dvoje prošli, a kroz šta sve više djece i mladih, nažalost, prolazi? Šta ste filmom željeli poručiti onima koji ga gledaju?

ADVIJA: Upravo iz razloga niske svijesti i informisanosti javnosti o našem problemu, mi MladiCe govorimo javno, jasno i glasno o onome sa čim se susrećemo. Film je bio naš način da kažemo da uz malo podrške možemo napraviti velike stvari, da nas bolest nije oštetila nego samo ojačala, da smo spremniji za život i velike bitke koje život nosi, nego mladi ljudi koji nisu imali tako teška životna iskustva, naročito iskustva sa bolešću i da smo uspješne mlade osobe koje ka svojim ciljevima koračaju hrabro i odgovorno. Također smo željeli da ovaj film bude motivacija onima koji se sada liječe.

MUHAMED: Mnogi iz naše okoline ne znaju šta mi sve tačno radimo, kao

i kroz šta prolaze oni koji se liječe. Mi smo kroz film pokušali približiti kroz kakve situacije, tokom liječenja, smo mi prošli i kakve smo sve prepreke imali i, hvala Bogu, pobijedili. Prikazali smo kako poslije liječenja koračamo sa mnogo vjere u sebe i bez obzira na naše situacije u kojima smo bili nastavljamo bez problema u onome što planiramo ostvariti u budućnosti. Ne tražeći nikakva sažaljenja od drugih, mi radimo na sebi sa željom da postignemo nešto, da pomazemo onima koji dođu u situaciju u kakvoj smo bili mi kada smo se liječili.

**BILTEN:** Kako napraviti film o ovoj opakoj bolesti kod djece i mladih, a da on ne bude ni previše patetičan ni previše hladan? Mislite li da ste s ovim filmom to uspjeli? Koja kritika filma vam je najobjektivnija?

ADVIJA: Kroz naš angažman sve MladiCe nerijetko spominju da ne želimo sažaljenje, samo razumijevanje, a s obzirom na to da smo u filmu upravo mi, nije bilo teško izbjeći patetiku. Sve što radimo, radimo s puno predanosti, s dušom, prožeto ljubavlju pa nismo, uopće, morali brinuti o tome da li će biti hladno, to je gotovo nemoguće kada su mladi u pitanju. Tako da je "Velika bijela kuća" pravi primjer za dobar film o ovoj temi. Čuli smo dosta komentara, kako od stručnih lica sa festivala, tako i od ljudi iz okruženja, i u jednom se svi slažu: ova priča nikog ne ostavlja ravnodušnim.

MUHAMED: Osobama koje nisu ovo prošle je ovakvu vrstu filma veoma teško snimiti, ali nama je to bio najmanji problem, jer smo to radili srcem, a sve u cilju da pomognemo našim mališanima i da približimo kroz šta prolaze mladi ljudi tokom svog liječenja. Mi smo zadovoljni filmom koji smo snimili, ali i uspjehom poruke koju smo željeli poslati široj javnosti, a koju su prihvatili na pravi način. Samim tim što ljudi nakon projekcije pridu i čestitaju na tome kako se mi borimo i da ne odustajemo od života i borbe, u nam najveći motiv da nastavimo sa našim radom.

**BILTEN:** Oboje ste uspjeli, na sreću, izliječiti rak. U vrijeme vašeg liječenja u Sarajevu nije postojala Roditeljska kuća. Šta bi za vas i vaše porodice značilo da je tad postojao takav objekat?

ADVIJA: Roditeljska kuća je projekat neprocjenjivog značaja. S obzirom na to da, kao pacijenti, nismo imali jednu takvu olakšicu, kroz volontiranje smo shvatili vrijednost njenog postojanja. Ta vrijednost se ogleda kroz sve ono što Roditeljska kuća znači roditeljima i djeci koja se sada liječe i što bi značilo i nama da je tad postojala. Roditeljska kuća znači jednu toplu porodičnu atmosferu koja je pola ozdravljenja, podršku i pomoć stručnih lica, psihologa, socijalnog radnika, nas MladiCa kao živih primjera da je izliječenje moguće. Pored svih briga o bolesnom djetetu, roditeljima znači

brigu manje za smještaj i onaj vrlo važan osjećaj - osjećaj da nisi sam.

MUHMED: U vremenu kada smo se liječili, i ja i mnoge MladiCe, nije postojala Roditeljska kuća koja sad postoji i pomaže roditeljima kroz liječenje njihove djece. Stoga mi pokušavamo da pomognemo Udruženju da Roditeljsku kuću ostave u funkciji, jer znamo koliko to znači za izlječenje. U Roditeljskoj kući ne pruža im se samo boravak nego i toplina prave porodice, kao i pomoći i podrške u raznim načinima, što doprinosi da ne gube nadu i motivaciju u izlječenje njihove djece, kao što smo u dijelu filma to prikazali. Na žalost, nemaju svi tu svijest, jer Roditeljska kuća nema redovna primanja nego se finansira donacijama, a ne iz budžeta države, kao što bi trebalo, jer je ovaj objekat od velike važnosti za cijelu Bosnu i Hercegovinu.

**BILTEN:** Šta djeca i mladi najteže doživljavaju dok se liječe od raka, a šta je to što im u tom, za mnoge nezamislivo teškom, periodu donosi radost?

ADVIJA: Sam momenat saznanja da boluješ od kancera je veoma težak, a ono što je svima, pa i meni, najteže padalo jeste ta odvojenost od najbližih, porodice, prijatelja, rodbine, posebno ako te neko od tih prijatelja odbaci ili zaboravi. S druge strane, teško je gledati tužna lica roditelja, braće, sestara, ljudi koji te vole. Škola,

obaveze, hobiji sve nekako stane i sve ti to fali, uz to još čudni pogledi ili, još gore, pogledi sažaljenja zbog toga što si ćelav i blijed i nosiš masku, znaju zaista teško pasti. Ono što donosi radost i što čini da sve prethodno navedeno bude lakše prebroditi jesu ljudi koji su uvijek tu za tebe, koji ti nacrtaju osmijeh na lice, ugriju hladne, iglama iscrpljene, ruke, ugriju srce, koji su podrška i koji na sve načine pokušavaju da bar na trenutke zaboraviš tešku situaciju u kojoj se nalaziš, a ja sam ih, Bogu hvala, imala i uspijevali su.

MUHAMED: Ovisno od toga od čega djeca boluju, susreću se sa raznim poteškoćama. Moja najveća poteškoća jeste što nisam mogao hodati, jer su mi noge bile otkazale, ali svima koji se liječe jedna od poteškoća su reakcije na kemoterapije, jer one umrtvljuju želju za životom. Ipak, nešto što sve nas motiviše jeste porodična toplina i toplina ljudi oko nas koja nam daje motiv za život, i da nastavimo tamo gdje smo stali. Kada doživimo jedan poraz i padnemo, to nam daje motiv da se dignemo i koračamo još jači i sa još više želje, i iskustvom više, o kojem treba govoriti onima koji proživljavaju takva iskustva. I kao što naša poslovnica kaže: Rak nije bauk, pričajmo o njemu!





VIKEND U AJDINOVIĆIMA

## Oснаžiti MladiCe

U divnom okruženju sportsko rekreativnog centra Ajdinovići, tokom vikenda osnaživanja, organizovana je radionica za izradu godišnjeg plana rada, koja je okupila 22 MladiCe. Ovaj zaista impresivan broj još je jedan dokaz da se njihova grupa neprestano širi.

Druženje je upotpunila psihoterapeutkinja Nermina svojom psihološkom radionicom usmjerenom ka spoznaji glavnog značaja ovakvih okupljenja i druženja, kao i na bolje međusobno upoznavanje MladiCa.

Poslije radnih obaveza i aktivnosti, MladiCe su uživale u sadržajima koje Ajdinovići nude. Neki su vrijeme proveli na bazenu, u teretani, a neki prošetali. Sa ovog vikenda svi su ponijeli jednu novu energiju i motivaciju za događaje i aktivnosti koje planiraju u budućnosti.

Većina prisutnih MladiCa se liječila i izliječila na Hematoonkološkom odjeljenju Pedijatrijske klinike u Sarajevu, čijem su se osoblju od srca zahvalili na kvalitetnim tretmanima i njezi koju pružaju djeci koja se liječe. Ovi mladi ljudi izrazili su i neskrivenu zahvalnost Udruženju Srce za djecu oboljelu od raka, svojoj matičnoj organizaciji bez koje nijedan vikend osnaživanja ne bi bilo moguće realizovati, ali i svim drugim saradnicima, prijateljima i dobrim ljudima koji su im nesebično pružili podršku.



UZ 15. FEBRUAR, MEĐUNARODNI DAN DJECE OBOLJELE I LIJEČENE OD RAKA

## Važnost borbe i ljepota pobjede

Udruženje "Srce za djecu" svakog 15. februara, na Međunarodni dan djece oboljele i liječene od raka, širi svijest o raku kod djece. Mreža mladih izliječenih od raka, MladiCe, jedan su od najboljih primjera da je rak kod djece izlječiv. Stoga su njeni članovi, videom kojeg su snimili u sklopu vikenda osnaživanja, htjeli poručiti svima koji se bore sa istim neprijateljem da RAK NIJE BAUK!

I 2018. MladiCe su, kao i prethodnih godina, prisustvovala manifestaciji obilježavanja Međunarodnog dana djece oboljele i liječene od raka. Pozitivnošću, pjesmom i, kako nam kažu, samom pojavom, svjedočili su važnosti borbe i ljepoti pobjede.



NA HEMATOONKOLOŠKOM ODJELJENJU

## Ja sam ti prijatelj

Redovna aktivnost MladiCa jesu posjete Hematoonkološkom odjeljenju Pedijatrijske klinike KCUS-a. Jednu od posjeta iskoristili su kako bi, zajedno sa dječicom koja se trenutno liječe, poslali poruku podrške uoči utakmice našem

zmaju, reprezentativcu Edinu Džeki, koji je veliki prijatelj naših heroja.



IFTAR SA STANARIMA RODITELJSKE KUĆE

## Mi smo im primjer, mi smo im nada

Iftar MladiCa u Roditeljskoj kući je nešto što polako postaje tradicija. Ovakav vid druženja je veoma značajan, posebno za roditelje djece koja se trenutno liječe zato MladiCe ustrajavaju u pružanju podrške na ovaj način.



JUNI, MJESEC MLADICA

## Rak ne znači kraj

Međunarodni mjesec MladiCa, kojeg obilježavamo svake godine, nevjerovatno je simboličan. Mi slavimo život, volju, nove početke i pobjedu, pobjedu nad rakom.

I 2018. naša aktivna grupa liječenih od raka, koju čini 25 mladih jakih ljudi širom BiH, okupljenih pod imenom MladiCe, nizom aktivnosti pokazala je našem društvu, a i cijelom svijetu, da je rak pobjediv, izlječiv i da kada čujete riječ rak to ne znači kraj.

Sve aktivnosti su bile vezane za Roditeljsku kuću, jer je to mjesto gdje prisustvo MladiCa doziva nadu da

postoji sutra, motivaciju da se i druga djeca i roditelji mogu uspjeti izboriti sa rakom.

Svoj mjesec započeli su akcijom "MladiCe sade MladiCe". Tom prilikom su, u vrtu Roditeljske kuće, posadili drvo-mladicu, kao simbol života i podsjetnik ustrajnosti, nade i hrabrosti.

Pored toga, MladiCe su održale kreativnu radionicu sa djecom koja borave u Roditeljskoj kući. Pokazale im da nisu sama i da postoje oni koji su prolazili kroz sve ono kroz šta i ona danas prolaze.

Organizovali su i radionicu sa roditeljima kako bi im približili svoje iskustvo liječenja i borbe sa rakom. Svojim primjerom dali su podršku oboljeloj djeci, ali i njihovim roditeljima i ohrabрили ih da ne posustaju.

Radionicama su se priključili i volonteri Udruženja Srce za djecu oboljelu od raka koji su, pomažući u radu sa djecom i roditeljima, pokazali snagu volje i kako nekoliko sati odvojenog vremena može učiniti mnogo za druge, kako može vratiti osmijeh na lice jednog oboljelog djeteta.



MLADICE NA UNA REGATI

## Uvijek hrabro veslamo

Prošle godine, MladiCe su učestvovala i na 46. internacionalnoj Una regati, jednom od najvećih događaja u našoj državi. Okušali su se u raftingu na prelijepoj Uni i, zajedno sa rafterima sa cijelog Balkana, uživali u avanturi.

Karavana sa 48 čamaca i 15 kajaka krenula je iz Martin Broda. Petak je bio dan za pamćenje, regata se nastavila od Štrbačkog buka, a nakon pauze na Japodskim otocima uživali su uz muzički vremeplov. U Bihaću su imali priliku vidjeti skokove sa gradskog mosta i blobbing takmičenje u skokovima na zračni jastuk. Zabavni

program upotpunjen je velikim koncertom Marije Šerifović na Gradskoj otoci u Bihaću.

MladiCe se zahvaljuju organizatorima iz Nacionalnog parka Una, I love Una Aqua Centar, Amiru Amidžiću i Aldijani Hadžihajdarević, koji su ih pozvali i pružili im priliku da dožive i osjete Una regatu u punom sjaju, jer rafting na Uni je nešto što se mora probati barem jednom u životu i smjestiti u album životnih uspomena.



REHABILITACIJSKI KAMP VLAŠIĆ

## Volonteri za zdravlje

MladiCe su porasle, odrasle i više nisu učesnici kampa - sada su volonteri. Na Vlašiću, tokom Rehabilitacionog kampa, sad pomažu onima na čijem su mjestu i sami bili. Upravo zato su nezamjenjivi, jer niko ne poznaje osjećaje i potrebe te djece kao oni. I baš zbog toga, prošle godine, su bili glavna karika u realizaciji aktivnosti još jednog nezaboravnog druženja na Vlašiću.



MOJA KOSA TVOJA KOSA

## Sve za osmijeh

MladiCe su dale svoj doprinos i projektu "Moja kosa, tvoja kosa", gdje su redovno volontirali u svim bh. gradovima u kojima su održane akcije šišanja, praveći neraskidivu sponu između grada-domaćina i Udruženja.



REGIONALNA KONVENCIJA MLADIH LIJEČENIH OD RAKA - MAKEDONIJA 2018.

## Bogatiji za nova znanja

Peta regionalna konvencija mladih liječenih od raka sa prostora Hrvatske, Srbije, Crne Gore, Makedonije i Bosne i Hercegovine, održana je u Makedoniji od 11. do 14. septembra 2018. godine. U prelijepoj Strugi, smještenoj u dolini na obali Ohridskog jezera, uživali smo u prirodi, bogatoj kulturi, te brojnim sadržajima koje su organizatori pripremili.

11. septembra, osam bh. MladiCa, zajedno sa voditeljem, stiglo je u Skoplje. Domaćini su nas proveli kroz glavni grad Makedonije, ukrašen brojnim statuama, skulpturama, spomenicima, fontanama, mostovima... Proveli su nas i čaršijom, starim dijelom grada,

gdje smo imali priliku kupiti suvenire, ali i posjetiti muzej sa starim narodnim nošnjama, alatima i maketama izvornih makedonskih kuća.

Tokom konvencije, imali smo priliku slušati predavanja stručnjaka o temama od velike važnosti za naše zdravlje i budućnost.

Pored edukativnog dijela, uživali smo u ljepotama Ohrida, simboličnom paljenju i puštanju lampiona kako bi Zlatni septembar, mjesec podizanja svijesti o dječijem raku, zasijao još jačim sjajem - većom sviješću. I mi smo sijali na večernjim zabavama uz pjesmu i ples. Na kraju smo se, sa puno emocija, ali i neizostavnih osmijeha, oprostili jedni od drugih do naredne godine i novog neprocjenjivog okupljanja na drugom mjestu. Kući smo se vratili bogatiji za nova znanja, iskustva i nove prijatelje.



ZAJEDNO S VOLONTERIMA

## Za sat 550 vrpca

Nevjerovatno je šta sve mogu napraviti ljudi ujedinjeni oko zajedničkog cilja. Naši volonteri i MladiCe BiH - mladi izliječeni od raka koji su vodili radionicu, okupili su se i za samo sat vremena izradili 550 vrpca. Pored svega, predivno smo se družili, upoznavali jedni druge i razmjenjivali životna iskustva. Ponosni smo na naše volontere koji su odlučili dati svoj doprinos na ovaj način i simbolično obilježiti Zlatni septembar, te pokazati da im je stalo i da žele biti podrška djeci oboljeloj od raka.



DUBROVNIK FILM FESTIVAL 2018

## Veeelika bijela kuća!

Dokumentarac naših MladiCa žiri ocijenio kao ozbiljnu priču o osjetljivoj temi, priču o ljubavi i podršci

Dokumentarni film "Velika bijela kuća" mreže mladih liječenih od raka MladiCe, koji djeluju u sklopu udruženja "Srce za djecu oboljelu od raka", još je jedan podsjetnik da su velike pobjede moguće.

MladiCe su mladi ljudi koji su u djetinjstvu odnijeli najveću pobjedu svojih života, uspješno su pobijedili rak.

### Optimizam, motivacija, planovi

Pobijediti rak je zaista velika životna pobjeda, ali tu svakako nije kraj pobjedama za ove hrabre borce. Dokazali su to i velikim uspjehom na Dubrovnik film festivalu 2018., odakle je "Velika bijela kuća" odnijela glavnu nagradu, Grand Prix i postala najbolji film 7. DUFF-a.

Nagradu su primili MladiCe, Advija Džambas i Muhamed Mahmić, snažni mladi ljudi.

"Velika bijela kuća" je dokumentarac u kojem mladi, na osnovu svog sopstvenog životnog iskustva diskutuju o optimizmu, motivaciji, planovima za budućnost u ostvarenju svojih snova, sada i prije opasne bolesti koju su preživjeli.

Ovaj film je način da se pokaže da snovi mogu biti ostvareni, a prema riječima stručnog žirija DUFF-a on je "ozbiljna priča o osjetljivoj temi, priča o ljubavi i podršci".

### Problemi su rješivi

Film je u cijelosti autorski rad članova MladiCa, urađen isključivo volonterskim radom i velikim



entuzijazmom. Oni su na ovaj način željeli pokazati da neprestano moramo tražiti nove načine da mladi javno govore o problemima, ali i ukazati na mogućnosti za njihovo rješavanje. Snimatelj je bio Mirza Ajnadžić, a mentor Zoran Čatić iz Udruženja za kulturnu i medijsku dekontaminaciju.

Sedmi Dubrovnik film festival održan je od 18. do 21. oktobra 2018. U selekciji takmičarskog programa bilo je rekordnih 320 filmova djece i mladih iz desetak mediteranskih zemalja, od kojih je selekcijski žiri odabrao sedamdesetak u dvije dobne kategorije (do 15 godina i od 16 do 20 godina) i u tri, prema godinama autora, odvojene kategorije za animirani, igrani i dokumentarni film.

U četiri dana glavnog programa festivala u Dubrovniku okupilo se 150 djece, mladih, njihovih mentora i profesora, koji su kroz film, najjači medij, progovorili o okruženju u kojem žive, o svojim problemima, ali i lijepim stvarima koje ih nadahnjuju.

### Sarajevo: Bujica emocija

U velikoj sali Cinema City Sarajevo, pred domaćom publikom, stavili smo krunu na uspjeh "Velike bijele kuće": Na festivalu smo osvojili Grand Prix, a u Sarajevu srca svih 300 gostiju. Bujica emocija, suza, osmijeha, obilježila je premijeru, a osjećaj sreće i ponosa neće tako brzo iščeznuti. Premijera je pokazala kakvu podršku imamo.

### Travnik: Predivno

Prepun amfiteatar Edukacijskog fakulteta u Travniku, suze, jaki zagrljaji, učinili su da travničku premijeru pamtimo kao najljepšu uspomenu. Ugostili su nas studenti, profesori, asistenti i divno osoblje Fakulteta. Ovog puta, posebne zahvale idu našem dragom Muhamedu Mahmiću koji je organizovao premijeru filma na svom fakultetu, pa dragom Harunu, MladiCi iz Travnika, Emini Smajić, Fuadu Haliloviću i Nejri Musić jer ih ni loše vrijeme nije spriječilo da svojom pojavom, pričom i osmijesima u najboljem svjetlu prikažu ovaj naš projekat na koji smo izuzetno ponosni.



MALAK REGENCY HOTEL

## Toplina i ljubav

Malak Regency Hotel bio je domaćin udruženju "Srce za djecu oboljelu od raka" i mladim liječenim od raka. U sali hotela prikazan je film "Velika bijela kuća". Ono što je dominiralo i čime je sve odisalo na ovoj premijeri, jesu toplina i ljubav. Još jednom hvala svima koji su, na bilo koji način, doprinijeli ovom događaju i nadamo se da ćemo ponovo imati priliku za druženje i saradnju sa Malak grupacijom.



ZIMSKI DIPLOMATSKI BAZAR

## MladiCe volontirale

I 2018., drugu godinu zaredom, MladiCe su volontirale na zimskom diplomatskom bazaru održanom u sarajevskom Kulturno sportskom centru Skenderija. Organizatori bazara prepoznali su mnogobrojne vrijednosti samog postojanja i projekata Udruženja, pa su dio sredstava prikupljenih na bazaru odlučili donirati upravo udruženju "Srca za djecu oboljelu od raka". MladiCe su bile tu kako bi zainteresovanim posjetiocima na štandu predstavile rad Udruženja i načine na koje oni mogu pomoći.

PRAVI RECEPT ZA PRAVU LJUBAV

# Nejrino srce za našu djecu



Liječenje je ponekad jako dosadno i vrijeme prolazi jako sporo. U ovom periodu, važno je ostati pozitivan, a najlakši put prema pozitivnosti je imati prijatelja koji će u svakom trenutku nacrtati osmijeh na vašem licu.

Glasan smijeh, zagrljaji, ljubav i sreća, mogu se doživjeti samo ako ste na radionicama. Kažu da je motorika jako bitna, a sigurno je da motorike obrašćića nikad ne fali.

Nejra Musić mališanima uljepšava trenutke provedene u Roditeljskoj kući, koje ispunjava ljubavlju, iskrenom, neiskvarenom, dječijom, koju mališani crpe iz dubine svog srca i poklanjaju je nesebično svojoj Nejri.

Često joj se potkrade i koja suza koju vješto sakrije, a svojim milim glasom i pjesmom svakodnevno odvede dječicu u neku drugu dimenziju, u svijet gdje je sve onako kako želiš i o čemu maštaš.

Jako je važno razumijevanje, pa kada nisu za rad, zajedničko vrijeme rado provode čitajući priče, igrajući kreativne igre, ali i zagrljajima liječe bolne trenutke koji su nažalost, neizbježni.


Spretne ručice naše djece izrađuju najljepše narukvice, kreiraju najljepše motivirajuće radove i prave najljepša iznanađenja za svoje roditelje, braću, sestre, najbliže.

Radionice nisu samo edukativne i kreativne, radionice su pune osmijeha, ljubavi i prijateljstava. Ovdje se rađaju najljepše emocije, najljepši osmijesi naše djece i Nejre.

Šalju jasnu poruku: obećavaju pobjedu svakim osmijehom, energijom i ljubavlju koju pružaju jedni drugima!



# MladiCe jesu tim!



Teorija kaže da grupa postaje tim tek onda kada članovi organizovano počnu da rade na dostizanju nekog zajedničkog cilja. Ovaj proces se ponekad odvija sasvim spontano. Grupa se inicijalno raspada i kroz period obično obilježen haosom i konfuzijom, članovi regrupuju u manje timove, shodno svojim afinitetima i sposobnostima.

Iz grupe se izdvajaju inicijatori, implementatori, kritičari, socijalizatori i oni kojima je nezainteresiranost dominantna karakteristika. Ovakav prirodni način formiranja timova najčešće je neproduktivan, ali nam pruža jako korisne informacije, na osnovu kojih možemo proces nastanka timskog rada potpuno staviti pod kontrolu.



Ovo je bila jedna od tema na vikendu osnaživanja MladiCa, koji je održan u Hotelu Han na Bjelašnici. U dva kratka dana, neformalna grupa MladiCa postala je Tim MladiCe, zahvaljujući prije svega požrtvovanom i predanom radu njenih članova i izgrađenoj unutarnjoj disciplini, stečenoj dugom, mukotrpnom borbom s bolešću.

Kroz predavanja, zajedničke i individualne vježbe, prijateljske razgovore, ali i strastvene rasprave, 18 mladih ljudi koji su pobijedili rak značajno su unaprijedili svoja znanja i organizacijske vještine, pa time napravili slijedeći korak prema zadatom cilju: postati efikasan, funkcionalan, pozitivan tim koji će biti u stanju boriti se sa životnim i profesionalnim izazovima.

Bilo bi lijepo prepustiti se porivu i proglasiti kako su naše MladiCe naš najdragocijeniji rezultat, ali tim bismo došli opasno blizu jedne nezdrave vrste ponosa. Koliko god da su misija i najvažnija zadaća Udruženja djeca izliječena od raka, zasluge u velikoj mjeri, na kraju, pripadaju upravo njima i njihovim roditeljima.

Oni su ti na čijim plećima leži neshvatljivo teško breme, i samo oni imaju pravo i čast na ponos koji donosi izliječenje. Udruženju Srce za djecu oboljelu od raka pripada zadatak da to breme olakša, da MladiCama

pokušamo nadoknaditi dragocjeno vrijeme koje su izgubili u liječenju, a sve u cilju njihovog razvoja i rasta.

U dva kratka decembarska dana, operativni plan rada MladiCa za 2019. godinu je kreiran, zadaci podijeljeni, uloge jasno definirane. Slijedeći trening osnaživanja je određen za mart, isplanirano regionalno umrežavanje Mladica. Cilj postavljen: postati najbolji zagovarači i advokati djece oboljele od raka. Poželimo im mnogo uspjeha u dostizanju tog cilja.

Oni su ti na čijim plećima leži neshvatljivo teško breme, i samo oni imaju pravo i čast na ponos koji donosi izliječenje




## Napunili srca osmijesima

U okviru obilježavanja Dječije nedjelje 2018. godine smo, zajedno sa Udruženjem Srce puno osmjeha i velikim prijateljem djece Sašom Ristićem, organizovali tri radionice. Dvije su bile u Roditeljskoj kući, a jedna na Hematoonkološkom odjelu Pedijatrijske klinike KCUS-a.

Na prvoj, 2. oktobra, bili su mališani i roditelji koji su u tom trenutku bili smješteni u kući, te djeca iz Sarajeva koja su im se pridružila. Obradivali smo temu "Pas" - naučili smo osnovne informacije vezanih za tu domaću životinju ili ih se podsjetili. Uz prezentaciju o psima, radili smo i art projekat i napravili psa od papira. Sva djeca koja su željela, imala su priliku biti oslikana kao psi, a dobila su i balon u obliku psa na poklon. Bila je to uspješna radionica, na kojoj smo se nasmijali, ali i obnovili znanje i naučili nešto novo. Radionica je završena muzičkim dijelom, u kojem su djeca i prisutni zajedno pjevali i plesali sa našim volonterkama i klovnom Sašom.

Druga radionica Dječije nedjelje, 3. oktobra, bila je direktno posvećena djeci i roditeljima na Hematoonkološkom odjeljenju Pedijatrijske klinike Jezero. Mali tim volontera i klovnova je dobio dozvolu da provede vrijeme sa djecom koja su u tom trenutku bili smješteni na Odjelu. Družili su se sa djecom, modelirali balone, oslikavali im lica. Uz djecu su, naravno, i roditelji dobili posebnu pažnju. U igraonici Odjela volonteri i klovnovi otpjevali su nekoliko pjesama. Tu im se pridružio i mali pacijent koji je sa velikim optimizmom svirao zajedno sa klovnom Sašom.

Tema treće radionice, održane 5. oktobra u prostorijama Roditeljske kuće, bila je fotografija. Znatiželjnoj grupi djece i odraslih, o historiji i razvoju fotografije, osnovnim dijelovima i opremi za fotografiju, pričao je glavni fotograf Udruženja Srce puno osmjeha - Ilija Mynke. Upriličena je i mini foto-škola, gdje je svaki učesnik imao posebnu temu za svoje fotograafije. Osnovna tema je bila Roditeljska kuća, a u ovom dijelu aktivno su učestvovala i uposlenice Udruženja Srce za djecu.



*U Roditeljskoj kući podsjetili se svega o psima i bavili se fotografijom, na Odjeljenju pjevali i crtali*



# Oživjet će projekat Amra

Sve je počelo 2012. godine, kada je započeo projekat Amra čiji su potpisnici udruženje "Srce za djecu oboljelu od raka", Crveni krst/križa FBiH, Pedijatrijska klinika u Sarajevu, Zavod zdravstvenog osiguranja i reosiguranja FBiH, Ministarstvo zdravstva FBiH i Associazione Genitori Ematologia Oncologia Pediatrica A.G.E.O.P. Ricerca i Croce Verde Meldola-Predappio.

Cilj sporazuma o podršci projektu Amra bio je da, zajedničkim snagama, pružimo blagovremenu pomoć i podršku djeci oboljeloj od bilo kojih malignih oboljenja i njihovim porodicama, te da im pružimo bolje standarde liječenja, rehabilitacije i resocijalizacije kakve imaju njihovi vršnjaci u regionu i svijetu. Ovaj sporazum obuhvata oblast zdravstva na području malignih oboljenja kod djece, a pogotovo transplantacije staminalnih hematopoetskih ćelija (transplantacija koštane srži) u korist mališana oboljelih od onkoloških, hematoloških i onkohematoloških patologija koja se ne mogu tretirati u BiH.

## Šta je naša uloga

Razmjena znanja, iskustava i naučno kulturna saradnja u oblastima onkologije, hematologije i onkohematologije, te transplantacije staminalnih hematopoetskih ćelija ljekara iz Italije i ljekara sa klinika potpisnica pisma namjere su, također, jedan od ciljeva ovog sporazuma.

Osim toga, kroz projekat Amra, udruženje "Srce za djecu" je spona između naših malih pacijenta i bolnica u Italiji. Udruženje ugovara smještaj u roditeljskim kućama u Italiji i pruža maksimalnu pomoć pri prikupljanju i prevodenju potrebne dokumentacije koja je neophodna za izmještanje djeteta na liječenje u Italiju.

Udruženje "Srce za djecu oboljelu od raka" obezbjeđuje prijevoz oboljelim i njihovim roditeljima do određenog instituta ili roditeljske kuće u Italiji. Tokom liječenja, predstavnici Udruženja konstantno prate pacijente, te održavaju komunikaciju s njima, njihovim doktorima i institutima na kojima se liječe. Od 2012. u Italiju

je izmješteno 20 mladih pacijenata. Udruženje Srce za djecu uspješno saraduje sa italijanskim udruženjima koja se bave istim ili sličnim problemima, a ima i vrlo uspješnu saradnju sa institutima u Italiji.

## Ugostili Italijane

Cilj projekta Amra je olakšati put liječenja oboljelim pacijentima i da poveže naše kliničke centre sa institutima u Italiji da bi se unaprijedila uspješnost liječenja mladih pacijenata. Udruženje "Srce za djecu" čini direktnu sponu između italijanskih instituta, ustanova, udruženja i naših pacijenata.

Projekat je, na izvjesno vrijeme, bio prekinut, ali uz pomoć udruženja A.G.E.O.P. iz Italije i njihovog velikog prijateljstva, ponovo ga oživljavamo i nastavljamo pomagati našim najhrabrijim pacijentima pri izmještanju u Italiju.

Da to prijateljstvo traje i da je snažno pokazuje i posjeta naših dragih prijatelja iz Italije iz Croce Verde Meldola - Predappio. Ugostili smo ih i zaista smo se ugodno družili na Vrelu Bosne, a pridružili su nam se i predstavnici Crvenog krsta/križa FBiH. Ostaje nam nada, i neizmjerana volja, da i u budućnosti pomažemo našim mališanima kojima je potrebno liječenje van BiH.

*Kroz projekat Amra, Udruženje Srce za djecu je spona između naših malih pacijenta i bolnica u Italiji*



KAD TRIPTIH RADI

## Čisti genijalci!

Cijeli vizuelni identitet Udruženja, sav promo materijal koji koristimo kroz naše kampanje - od logotipa do vizuala za bedževe - radi nam super ekipa čistih genijalaca iz Triptiha. Bez njih ništa ne bi izgledalo ovako savršeno. Ovaj put smo ih pozvali na zajedničku kafu, doručak i druženje, jer to je najmanje što smo mogli uraditi.

Hvala vam na odličnom poslu koji obavljate, hvala vam na svim idejama i kreacijama. Hvala, prije svega, na prijateljstvu koje ste nam povjerili, na ogromnom srcu koje imate. Hvala na pozitivnoj energiji koju nam uvijek nekako prenesete, hvala na svakom savjetu i podršci koju nam sve ovo vrijeme pružate. Zajedno smo jači!



BILI SMO U MOSTARU

## Korisno i inspirativno

Posjetili smo Hematoonkološki odjel Klinike za dječije bolesti Kliničke bolnice Mostar i dr. mr. sc. Borka Rajića, pedijatra i hematologa koji se tu brine za naše mališane. Odjelu i doktoru Rajiću smo pružili našu ruku prijateljstva i stavili se na raspolaganje te pozvali ih da zajednički budemo uz naše mališane. Naišli smo na toplu dobrodošlicu i veliku podršku. Posjeta Mostaru je bila divna, korisna, inspirativna i puna emocija.



AGENCIJA ZA BANKARSTVO FBiH

## Dobra životna navika

Agencija za bankarstvo Federacije Bosne i Hercegovine (FBA) je Svjetski dan štednje 2018. obilježila u duhu društvene odgovornosti. U cilju očuvanju sigurnog i podsticajnog okruženja, za one koji na samom početku svog života trebaju pomoć društva, FBA je donirala novac KJU Dom za djecu bez roditeljskog staranja Bjelave, JU Dječiji dom Mostar i udruženju "Srce za djecu oboljelu od raka".

Donirano je ukupno 30.000 KM, svakoj od ustanova po 10.000 KM u potrebnoj opremi i sredstavima. Svjetski dan štednje prilika je da se istaknu pozitivni aspekti štednje kao dobre životne navike, ali i prilika da se podrže ustanove koje rade socijalno odgovorne poslove.



UGOVOR SA VERLABOM

## Marka po marka

Od svake verifikacije medicinskog uređaja odvaja se jedna KM za pomoć udruženju "Srce za djecu oboljelu od raka". Ugovor o tome, u Roditeljskoj kući u Sarajevu, potpisali su direktor laboratorije Verlab Almir Badnjević i direktor Udruženja Fikret Kubat.



NAŠI DOBRI PRIJATELJI IZ BH TELECOMA

## Vratiti djecu u normalni život

Osnovna sindikalna organizacija sarajevske Direkcije BH Telecoma i sekcija JOB-a Unije veterana BiH te kompanije pridružili su se velikom timu ljudi koji podržavaju naše Udruženje i Roditeljsku kuću. Riječ je o projektu "Sindikat i JOB srcem za djecu", kojeg je osmislio Jasmin Salihbegović. On i njegove kolege prepoznali su dugogodišnji rad udruženja "Srce za djecu oboljelu od raka", shvatili koliko je bitna podrška djeci oboljeloj od raka i njihovim porodicama, te kako mala pomoć može dobro doći onima koji se nalaze pred najvećim životnim izazovom - onim da sačuvaju život svog djeteta. Zato su skupili svu svoju pozitivnu energiju i donijeli je i prenijeli tokom posjete Udruženju i Roditeljskoj kući.

Tada su sindikalna i organizacija veterana sa Udruženjem potpisale memorandum o saradnji na četiri godine, po kojem će Osnovna sindikalna organizacija BH Telecoma i Udruženje građana JOB odvajati 1.300 KM godišnje, od čega će 1.000 KM ići za potrebe Roditeljske kuće, a 300 KM za potrebe Rehabilitacionog kampa koji se održava jednom godišnje za izliječenu djecu. Time pomažu našoj djeci u dva segmenta - tokom i nakon liječenja kada im je, također, potrebna podrška jer njihova borba ne završava završetkom bolničkog liječenja. Nakon boravka u bolnici, potrebno je vratiti djecu u normalne životne tokove, integrirati ih u matične sredine iz kojih su dugo bili izolovani, te rehabilitovati njihove organizme, pomoći im da se osnaže, da povrate fizičku snagu i snagu duha.



## XV REDOVNA SKUPŠTINA

## Zlatan ostao uz nas

Na XV redovnoj skupštini udruženja "Srce za djecu oboljelu od raka", usvojeni su izvještaj o radu za 2018., finansijski izvještaj za 2017., te plan rada Udruženja za 2019. godinu. Zlatan Velagić, dugogodišnji predsjednik Upravnog odbora Udruženja, odstupio je sa ove pozicije iz ličnih razloga i na vlastiti zahtjev. Međutim, Zlatan je i dalje sa nama i uz nas, ali u drugoj ulozi. Za novog predsjednika Upravnog odbora izabran je Džemil Špago, otac našeg hrabrog Benjamina iz Mostara. Ne sumnjamo da će odlično obnašati svoju funkciju u Udruženju.

Svakim danom se trudimo biti maksimalno transparentni, kako prema donatorima i javnosti, tako i prema našim članovima, članovima Skupštine, našim roditeljima. Redovne skupštine su, upravo, jedan od vidova te transparentnosti do kojih mnogo držimo.



## TRADICIJA MD FAMILY

## Naš(i) Mlinar(i)

Kompanija MD Family (Mlinar) nastavila je, na otvaranju četvrte, a ukupno treće pekare u lancu Mlinarovih franšiza u Sarajevu, sa humanom tradicijom, a donacija od 2.500 KM i ovaj put je adresirana na

udruženje "Srce za djecu oboljelu od raka".

Uz saradnju, koju od prvog dana ima sa humanitarnom organizacijom Pomozi.ba, Mlinar BiH je finansijsku podršku ovaj put pružio mališanima kojima je to najpotrebnije - Roditeljskoj kući. Iz Mlinara BiH naglašavaju da je veoma važno odazvati se na projekte humanog karaktera, te na taj način pružiti podršku i brigu onima kojima je to najviše potrebno.



## EMIR I ALEN SE SJETILI

## Važan je i toplomjer

Emir Šljivo i Alen Dizdarević, Bosanci koji žive i rade u SAD, kupili su i donirali nam dva visokosofisticirana toplomjera - Exergen TemporalScanner. Toplomjeri, namijenjeni brzoj i pravovremenoj dijagnostici naših mališana, ustupljeni su hematološkim odjeljenjima u Sarajevu i Tuzli. Vrlo često, tokom liječenja, potrebno je koristiti toplomjer, ali je veoma bitno djeci temperaturu izmjeriti brzo i efikasno budući da ona često vrlo burno reaguje na toplomjer zbog prethodnih procedura koje su za njih bile traumatične i nerijetko bolne. Ovim toplomjerima se vrijeme mjerenja temperature maksimalno skraćuje, djeci omogućuje manje trauma, a predstavljaju i ogromno olakšanje medicinskom osoblju. Veliko hvala našim donatorima što su mislili i na ovaj aspekt liječenja i što će djeci olakšati barem jednu bolničku proceduru.



## LEPIRI NE ZABORAVLJAJU

## Doživotna prijateljstva

Najveće zadovoljstvo nama, u Udruženju, je kad srećemo našu dječicu koja su uspješno izliječena i čast nam je, zajedno sa roditeljima, gledati tu djecu kako odrastaju i postaju uspješni mladi ljudi. Prijateljstva s roditeljima i djecom su doživotna, ostajemo s njima u kontaktu i njihovi kontrolni pregledi ne prođu bez bar jedne kratke posjete Roditeljskoj kući. Porodica Lepir - otac Kemal, majka Ramiza i naš dragi Dženar - jedna je od njih, a obradovali su nas i donacijom. Firma Namještaj Lepir, u znak zahvalnosti Roditeljskoj kući, te podrške ostalim porodicama koje se bore sa svim onim s čim su se Lepiri i sami borili, izradila je kuhinju i poklonila za stan u kojem borave roditelji i djeca tokom svog liječenja. Veliko hvala našim dragim Lepirima.



## U TRAVNIKU I U BIHAĆU

## Geografija nije problem

Udruženje "Srce za djecu oboljelu od raka" djeluje na području cijele FBiH, trudi se što više biti uz svu djecu i roditelje koji su fizički udaljeni i pruža im adekvatne usluge i podršku koja je prijeko potrebna i nakon intenzivnog bolničkog liječenja.

U Unsko-sanskom kantonu i u gradu Bihaću dogovorili smo saradnju sa poliklinikom Muminović o pružanju psihološke pomoći djeci liječenoj od raka i njihovim roditeljima sa područja USK. Na području Srednjobosanskog kantona smo, sa jahačkim klubom Mustang iz Travnika, obezbijedili školu jahanja i terapeutsko jahanje za sve naše mališane koje to zanima.



## S AMMAROM NA VLAŠIĆU

## Osmjeh je moj znak

U rehabilitacionom kampu udruženja "Srce za djecu oboljelu od raka" na Vlašiću, sniman je spot za pjesmu "Osmijeh je moj znak" koju je Ammara Mistrić napisala i poklonila djeci oboljeloj od raka i Roditeljskoj kući u Sarajevu. U spotu se, zajedno sa Ammarom, pojavljuju izliječena djeca koja su iz svoje najteže životne bitke izašla kao pobjednici. Pjesmu i spot, zajedno sa prijateljicom Ammarom Mistrić, promovisali smo u maju, u Centru za mlade u Sarajevu.



## OBRAZOVANJE GRADI BIH

## Djeca su naša vrijednost

Naša djeca su veliki potencijal i vrijednost za bh. društvo, zajednički je zaključak do kojeg smo došli u

razgovoru sa Jovanom Divjakom i uposlenicima Udruženja Obrazovanje gradi BiH. Misija ovog Udruženja je definisana građanskom svijesću i odgovornošću da se pomognu iznimno ranjive kategorije djece i mladih u zadovoljavanju obrazovnih, edukativnih, rekreativnih i kulturnih potreba, kako bi postali korisni i progresivni članovi zajednice. Tokom čika Jovine posjete razgovorali smo o mogućoj saradnji i budućnosti naše djece.



## SARAJEVSKI POLUMARATON

## Azra i Šaban zajedno na cilju

Azra Grizović, studentica iz Mostara, na ovogodišnjem Sarajevu polumaratonu trčala je za udruženje "Srce za djecu oboljelu od raka". Prije polumaratona je prodavala metre koje je pretrčala i sav prikupljeni novac od njihove prodaje donirala je našem Udruženju. Na utrci je bio i naš MladiCa, Šaban Delić, koji je, zajedno sa Azrom, simbolično ušao u cilj.



## KISELJAČKI ZLATNI SEPTEMBAR

## Antonio, iz prve ruke

U posljednjim danima Zlatnog septembra, predivna priča došla nam je iz Kiseljaka. Naš MladiCa, Antonio Tolo, je, zajedno sa volonterima Srednje škole Ivan Goran Kovačić iz Kiseljaka, širio svijest o raku kod djece. Pošto je Antonio u djetinjstvu liječen od malignog oboljenja, najvjernije je mogao građanima Kiseljaka prenijeti sve ono kroz šta prolaze djeca oboljela od raka i sve probleme s kojima se susreću.



## OŠ DR. BORIS ČORIĆ

## Djeca s djecom

U posjeti su nam bili učenici i nastavno osoblje Osnovne škole Dr. Boris Čorić iz Kreševa, koji su donijeli prigodne poklone za našu dječicu.







OŠ SAFVET-BEG BAŠAGIĆ

## Iskreni prijatelji

Naš drug Azur i njegov IV1 razred Osnovne škole Safvet-beg Bašagić iz Breze, sa učiteljicom Senom Čosić, crtali su i pisali poruke za naše hrabre mališane. Veliko hvala učiteljici i djeci na ovoj predivnoj podršci. Sretni smo što imamo prave i iskrene prijatelje.



ŠIRIMO SARADNJU

## Ima prostora za vlasuljare

Bilo nam je zadovoljstvo ugostiti naše prijatelje iz Srednje škole poljoprivrede, prehrane, veterine i uslužnih djelatnosti iz Sarajeva, direktora Suada Alića i koordinatoricu frizerske škole, Amelu Fazlagić. Nakon veoma uspješne akcije šišanja u njihovoj školi, kod nas smo razgovarali o potencijalnoj saradnji u domenu vlasuljarstva i izrade perika. Nadamo se da ćemo to i ostvariti i u budućnosti napraviti još mnogo dobrih projekata.

SREDNJOŠKOLSKI PROTİM

## Mladi, plemeniti, poduzetni

Mladi i poduzetni ljudi sa plemenitom dušom, iz Srednje poslovno-



komercijalne i trgovačke škole Sarajevo, odlučili su da novčanu nagradu (pa i više od toga) koju su osvojili za dokumentarni film, poklone onima kojima je doista potrebno. U Roditeljskoj kući dočekala ih je Ajla Beganović, djevojčica iz Cazina, koja se sa svojih tek 16 hrabro suočila i borila sa opakom bolešću. Ajli i njenim velikim i malim saborcima sarajevski srednjoškolci istinski su zaželjeli što skorije ozdravljenje i konačnu pobjedu. Zahvaljujemo se kompletnoj ekipi Srednje poslovno-komercijalne i trgovačke škole i njenog ProTima na učešću u projektu i doprinosu pozitivnim pričama, a oni su Džanin Begović, Samina Džudžević, Dženan Kovačević, Admir Peljto, Melisa Macić, Lejla Fijuljanin, Ajla Rapkić, Aida Omerović, Merjem Sadikaj, Zlatko Karišik i Faris Jamaković.



DRUGOVI STALI UZ ANESA

## Kosa nije važna

Najteže životne situacije iznesu na površinu najljepše ljudske osobine, o čemu svjedoči i priča o ljudskosti i snazi mladosti iz Osnovne škole u Kaknju. Naime, tamo živi Anes Begić, dobri dječak i divno pametno biće, koje se sa svojih samo 15 godina, moralo suočiti sa leukemijom. Njegova borba je krenula i trenutno je u Roditeljskoj kući na Jezeru u Sarajevu.

Koliko god je tužna ova priča, ona ipak ima snagu da izvuče iz ljudi ono najbolje. Dječakovi drugari iz osnovne škole dugo su smišljali kako da mu

pruže podršku i pokažu da svaki dan misle na njega. U znak podrške Anesu, i kako bi okazali solidarnost, Faruk i još 17 prijatelja su ošišali svoju kosu na nulu. Sam Faruk je imao dugu kosu i u trenutku šišanja imao je 40 cm kose koju je donirao Udruženju Srce za djecu oboljelu od raka u okviru projekta "Moja kosa tvoja kosa", za izradu perika djeci koja su privremeno ili trajno izgubila svoju kosu.

Faruk i drugovi su pokazali solidarnost na djelu, pokazali su šta znači suosjećati, voljeti i bodriti. Oni su pokazali Anesu da nije sam, da stoje uz njega, da mu čuvaju leđa i da su tu za njega i u dobru i u zlu.



STARI I NOVI PRIJATELJI

## Svaki paket zlata vrijedi

Vakufska direkcija Islamske zajednice BiH i Generalna direkcija vakufa Republike Turske su ponovo pokazale da su društveno odgovorne institucije i da osjećaju obavezu da se brinu za najugroženije kategorije našeg društva. Zajedničkim snagama su podržali naše Udruženje i obezbijedili pakete pomoći za 15 naših porodica. Inače, Vakufska direkcija je naš dugogodišnji donator i prijatelj, i neprestano brine za porodice djece oboljele od raka. Zahvaljujemo od srca što mislite na djecu oboljelu od raka i njihove najbliže onda kada je to njima najpotrebnije.



DANI KOJE NE ZABORAVLJAMO

## Uvijek je veselo

Omiljeni dani su nam rođendani naših hrabrih mališana. Gdje god da smo, u Roditeljskoj kući ili na odjeljenjima u Sarajevu i Tuzli, iskoristimo priliku za slavlje. Slavljenici se smiju, ali i svi mi s njima. Pjevamo, plešemo, pušemo svijeće i jedemo tortu. Rođendanske zabave su uvijek zabavne i vesele. Tokom 2018. smo obilježili rođendane Ajmana i Ajne, Lejle, Mehmedalije i njegove sestre Ajlin, Elmana, Anide i Amile.



*Poštovani prijatelji,  
volonteri i partneri,*

*Zahvaljujemo Vam na  
nesebičnoj pomoći i podršci.*

*Naša obaveza je da vaše  
donacije trošimo namjenski,  
transparentno i odgovorno.*





Humanitarni broj

**17010**



**SRCE ZA DJECU**



[www.srcezadjecu.ba](http://www.srcezadjecu.ba)



SrceZaDjecu



srcezadjecu



SrceZaDjecu



Betanija bb,  
71000 Sarajevo



[info@srcezadjecu.ba](mailto:info@srcezadjecu.ba)



Srce za djecu Sarajevo  
+387 33 215 416



Srce za djecu Tuzla  
+387 35 266 306

**Žiro račun:**

Raiffeisen Bank  
Bosnia and Herzegovina  
161 00000 388 900 27

**IBAN:** BA 391610000038890027  
**S.W.I.F.T.:** RZBABA2S